



Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads

K120 | **K175**

200 kads + takis
Printin tasol
Wanpla sait, ful kala 300 gsm pepa.

200 kads + takis
wantaim disain wok

Only at... **THEODIST LTD**
THE STATIONERY SUPERMARKET
Waigani Drive, PCM | Markham Road, LAE
Php: 313 9900 / 7232 1300 | Php: 472 5488 / 7091 7854
sales@theodist.com.pg | sales@theodist.com.pg

KOLIM MIPLA NAO!

Neks Wik

The Catholic Reporter



El Nino dai ripot i no klia yet



Esther Bralyn Wani i raitim

BIKPELA san i draim ol wara na kaikai na ais i pundaun long ol ples insait long kantri i kamapim bikpela hangere na dai long sampela provins pinis.

Ekting Dairekta bilong Nesenel Disasta Senta, Martin Mose i tok em i no laikim ol pipel long tok olsem sampela dai i kamap bikos long draut o strongpela san inap Helt Dipatmen i mekim wok painim aut bilong ol na tok klia stret long wanem as bilong ol dai i kamap.

Mista Mose i mekim dispela toktok bihain long sampela nius ripot i kamap long dispela wik long sampela dai i kamap. Em i tok inap nau i nogat wanpela klia namba i kamap yet olsem dai i kamap bikos long El Nino.

"Ol pipel i save laik long kolim namba na ripot tasol i nogat wanpela trupela namba i kamap yet long givim trupela rekot bilong dai i kamap tasol sampela i save laik long mekim nius tasol. Bikpela samting em long mekim wok painim aut pastaim wantaim Helt Dipatmen," Mista Mose i tok.

Em i tok bihain long dispela wok painim aut i kamap bai ol i ken tokaut long hamas namba

bilong dai i kamap long kantri bikos long strongpela san o El Nino.

Em i tok ol i bin kisim ripot long Helt Dipatmen em long 6-pela dai i kamap long Simbu provins bikos long draut o strongpela san.

Long wankain taim, Mista Mose i tok ol provins long Hailans rijon i kisim pinis ol rilif o kaikai long helpim ol long taim bilong hevi.

Mista Mose i tok opis bilong em i save long hamas kaikai ol saplaia i givim aut na bihain i go long hap bilong tilim, tasol ol bai go het long givim ol saplai long ol ples i kisim bikpela bagarap sapos kaikai i sot long sampela hap.

"Em i go orait na mipela i save olsem pinis bilong dispela wik o stat bilong neks wik bai olgeta hap i kisim ol saplai," Mista Mose i tok.

Em i tok ol i yusim mani mak olsem K3 milien pinis long kaikai na ol asesmen tim i go long ol ples i kisim bagarap long El Nino.

"Long Nesenel gavman em i wok bilong mipela long luksave olsem ol pipel bai gat kaikai na long wanem rot em bai go kamap bai mipela i mekim kamap," Mista Mose i tok.

I go moa long pes 2...

K9

Dial *123*9# to subscribe

24 hrs validity

24 mins talk time

International calls for less

Contact us now!
Customer Care 76003555
support@bmobile.com.pg

www.bmobile.com.pg



TIPNG wokbung wantaim Palamen long daunim korapsen

Aja Potabe i raitim

NESENEL Palamen i wokbung wantaim Trensparensi Intenesenel PNG (TIPNG) sapta long larim ol manmeri i sekim na skelim gut wanem samting i kamap long Nesenel Palamen.

Wokbung bilong TIPNG na Nesenel Palamen i kamapim wanpela gutpela rot long daunim mak bilong pasin korapsen long PNG.

Na tu dispela em i wanpela rot we ol pipel i ken lukluk gut long wanem kain wok stret ol lida na memba bilong ol i wok long memkim long Nesenel Palamen.

Ekting Klak bilong Nesenel Palamen Kala Aufa i tok Palamen Spika Theo Zurenuoc i bin tingting long larim ol manmeri bilong dispela kantri i kisim ol toktok bilong ol memba na lida bilong ol long Palamen.

Na Spika Zurenuoc i bin

kamapim wanpela nupela projek ol i kolim 'Open Palamen Projek'. Dispela projek i lukim planti manmeri i amamas long sekim wanem samting i wok long kamap long Palamen Haus.

"Ol pipel i mas save long wanem samting i kamap long Palamen Haus bikos dispela haus em i haus bilong ol pipel. Na mi amamas long sapot TIPNG na EU (Yuropen Yunion) i givim long palamen," Aufa i tok.

Em i tok TIPNG na Yuropen Yunion (EU) i bin sapotim Nesenel Palamen long mekim dispela projek.

"Mi amamas long sapot bilong TIPNG na EU long larim opis bilong Spika i karimaut dispela namba wan wok long kisim palamen i go daun klostu long ol pipel," Aufa i tok.

Aninit long dispela projek, palamen haus i opim wanpela nupela websait na teks mesis

senta long larim ol pipel i sekim wanem samting i kamap long palamen.

"Ol pipel i ken askim memba o gavana bilong ol long wanem samting i wok long kamap long ilektoret o provins bilong ol," Aufa i tok.

Moa long 165 000 manmeri long PNG na ovasis wantaim i wok long sekim dispela websait (www.parliament.gov.pg) long sekim wanem samting i kamap long palamen.

Dispela websait tu i ken larim ol manmeri long askim ol lida bilong ol long wanem samting i kamap long ilektoret or provins.

Na tu ol manmeri i ken salim teks mesis i go stret long ol lida bilong ol. PNG em i namba wan kantri long wol long larim Palamen i op long larim pipel i stap klostu long ol lida.

"Dispela bai larim demokrasi i fridom bilong pipel i stap yet. Pipel i ken wokbung wantaim ol lida. Na mak bilong pasin korapsen i ken go daun," Aufa i tok.



Palamen Haus. Fail foto

Koreksenel Sevis em Ministri bilong God – CS Komisina, Waipo

Frieda Sila Kana raitim

"YUMI olgeta nidim God long go het long developmen wok bilong yumi. Dispela em ministri bilong God long ol wokman na meri na ol kalabus man na meri tu," Mista Michael Waipo, Koreksenel Sevis Komisina tok.

"Em laik na plen bilong God long yumi kam bung long hia tude," Mista Waipo tok olsem long tiam em putim gen CS Dipatmen go long han bilong God. Dispela strongim gen toktok bilong em long taim ol bin makim em long kamap ekting komisina we em bin putim CS go long han bilong God.

Mista Waipo mekim singaut go long olgeta wodaman na meri long tanim bel na tok sori long God.

Bihain long Mista Waipo opim de bilong prea, Senia Pastor bilong Asembli ov God Sios long Bomana, Tina Malana autim toktok bilong God long buk bilong Matyu sapta 26:36-41 taim Jisas bin go long pre long Gethsemane na lukim ol disaipel bilong em no was wantaim em tasol ol wok

long slip tumas.

Pastor Tina tokim olgeta lain stap long pre de olsem em wok bilong olgeta lain long was gut na pre. Em tok God makim yumi long kamap wasman bilong ol hap yumi stap long en o long ol komyuniti bilong yumi.

Em tok, ol wasman em ol gat olsem ol sekyuriti gat nau stap planti tru long PNG. Em tok piksa bilong yumi gat planti sekyuriti gat kampani long kantri soim wankain samting stapnsait long spirit tu.

I gat ol spirit stap olsem gat long bosim ol kain kain hap ol pipel stap long en.

"Yumi mas was na pre oltaim bikos birua bai kam long kain kain engel long bagarapim yumi," Pastor Tina tok.

Em tok, pasin no gut wok long kirap long ol komyuniti bilong yumi na yumi mas was na pre. Wankain olsem Jisas bin tokim ol disaipel bilong en long gaden bilong Gethsemane. Tasol ol no bin bihainim tok bilong em na ol kirap no gut em ol birua kamap pinis long kisim Jisas go.

Em tok moa olsem Buk 2 Stori sapta 7, ves 14 tok ol manmeri bilong God husat karim nem bilong em mas tok sori long sin bilong ol na pre na bai em harim ol na stretim graun bilong ol.

"Taim yumi lukim pasin no gut kamap bikpela raunim yumi, em yumi mas kirap na tok sori long God na pre long God lusim rong bilong yumi, na em bai harim pre bilong yumi na mekim gut long yumi gen," em tok.

"Yumi mas tanim bel long pasin bilong slip tumas. Sapos yumi sios bilong God kirap wantaim na daunim yumi yet na tok sori long God na o ken tingim wanem kain lotu banis yumi gat, God bai mekim orait graun bilong yumi.

Dispela em bin namba wan taim long CS Dipatmen holim de bilong ripentens na pre wantaim ol kalabus lain na ol wokman na meri bilong CS hetkwota na long Bomana kalabus.

Dipatmen bin redim bikpela kaikai we ol wokman na ol kalabus wantaim ol visita bin kaikai long dispela de.



Mista Michael Waipo, CS Komisina.

El Nino dai ripot i no klia yet

I kam long pes 1...

Em i tok ol i yusim mani mak olsem K3 milien pinis long kaikai na ol asesmen tim i go long ol ples i kisim bagarap long El Nino.

"Long Nesenel gavman em i wok bilong mipela long luksave olsem ol pipel bai gat kaikai na long wanem rot em bai go kamap bai mipela i mekim kamap," Mista Mose i tok.

"Mi ogenaisim wanpela tim bai go long Hagen we planti saplai bai kam long en long saplaim ol narapela Hailans provins. Ol bai

stap long Hagen long tupela wik na luksave olsem olgeta kago ol i baim long Dae Won holsel inap ol i givim aut long ol provins long Hailans," Mista Mose i tok.

Em i laikim ol pipel long save olsem i no olgeta provins i kisim bikpela bagarap, em ol sampela hap tasol insait long provins. Em i tok long Westen Hailans em Tambul distrik na Enga provins em Kandep, long Sauten Hailans em Apa-Lowa Mendi bikos long Maunten Giluwe. Long Simbu

provins em Suave.

Kaikai saplai bilong Goilala long Sentral provins bai ol i kisim long dispela wiken.

Tripela tim i go ausait long ol provins, wanpela i go pinis long Momase rijon na bai go bek long Mosbi long dispela wiken, long Niugini Ailan rijon bai ol i go nau na long wiken bai ol i go aut long Sauten rijon.

Bihain long dispela asesmen bai ol luksave long ol narapela hap tu i kisim bagarap.



Ol meri na man kalabus sindaun na harim ol toktok bilong ol bos bilong Koreksenel Sevis na Pastor toktok na pre long dispela taim. Foto: CS Midia

Skulim yangpela manmeri long tok nogat long pasin korapsen

Aja Potabe i raitim

HANMAK bilong pasin korapsen em i planti tru long PNG, tasol yumi ken daunim level o mak bilong en sapos yumi skulim ol yangpela manmeri long dispela kantri.

I gat planti rot long daunim pasin korapsen i stap, tasol namba wan rot long daunim em yumi mas skulim ol yangpela manmeri long painimaut pasin korapsen na tok no gat long en.

Projek Meneja bilong Trensparensi Intenesenel PNG (TIPNG) Pole Kale i tok yumi mas skulim ol yangpela manmeri long no ken mekim pasin korapsen bikos pasin korapsen em i wok long nau kamap olsem pasin na kalsa long PNG.

"Kain pasin olsem braiberi, wantok sistem, stil na yusim politikel pawa long mekim samting no gut em ol pasin korapsen tasol. Yumi noken lainim ol yangpela manmeri long mekim dispela kain pasin no gut," Kale i tok.

Projek Opisa bilong Nesenel Palamen John Varey i tok Nesenel Palamen i laik daunim mak o level bilong pasin korapsen insait long PNG.

Varey i mekim dispela toktok long wanpela woksop TIPNG i bin holim long Pot Mosbi long Tunde dispela wik.

"Aninit long was bilong Spika Theo Zurenuoc, Nesenel Palamen i laik daunim mak o level bilong pasin korapsen insait long kantri bilong yumi," em i tok.

"Braiberi, wantok sistem, na pasin bilong stilim mani bilong pipel i noken kamap long PNG. Ol manmeri i noken yusim fridom long mekim pasin nogut," Varey i tok.

Mausmeri bilong Yuropen Yunion (EU) Maria Cristobal i tok demokrasi system bilong gavman long PNG em i strong tru.

"Tasol mak bilong pasin korapsen tu i wok long go antap. Planti ol manmeri i luksave olsem PNG em i wanpela fri kantri; fridom i stap long long hia long larim ol man i mekim bisnis o mekim arapela samting," Cristobal i tok.

Em i tok planti ol investa o bisnis manmeri i putim ai long mekim bisnis o inves.

"Tasol sapos ol i harim olsem pasin korapsen em i pulap long PNG, ol bai no inap kam mekim bisnis long hia. Sampela ol turis tu bai les long kam sapos ol i harim nem bilong pasin korapsen," em i tok.

Cristobal i amamas long makim maus bilong EU na wok-bung wantaim Nesenel Palamen na TIPNG long daunim pasin korapsen long PNG.

Boda wokman mas wok bung wantaim

Aja Potabe i raitim

OL wokman bilong PNG na Australia gavman husat i save mekim ol boda patrol wok bilong tupela kantri i mas wok bung wantaim long stopim intenesenel drak tred.

Dispela em i toktok bilong Elias Petropolous, husat i save wok wantaim Australian Boda Fos. Petropolous i bin givim dispela toktok long wanpela drak awenes woksop long Pot Mosbi we polis bilong PNG i bin go pas long karim aut.

Petropolous i tok planti taim ol boda fos i save mekim wok long ol yet. Tasol nau tekonojiji na rot bilong mekim intenesenel tred i senis.


"Dispela i soim yumi ol wokman bilong gavman tu i mas senisim pasin bilong wok. Yumi mas skelim ol risos na intelijens wantaim. Mi laikim yumi long wok bung wantaim na stopim intenesenel drak tred," em i tok.

Em i tok ol drak dila o ol manmeri bilong kisim drak i go daun long Australia i save haitim gut tru stret drak insait long ol arapela samting.

"Sampela bilong ol dispela samting no gut em mipela i save sekim gut na kisim. Tasol planti ol samting no gut mipela i save painim hat long sekim hariap. Sampela ol drak mipela i no sekim long en i save go kamap long Australia."

Em i tok tude kainkain drak i wok long i go long Australia. Em i tok sampela drak olsem mariwana i save kam long PNG na go daun long Australia.

"Yes, i gat mariwana o spak brus i stap long PNG. Sampela bilong ol dispela spak brus i save go long Australia," petropolous i tok.



Korapsen katun bilong Jada Wilson.

A SMART SOLUTION FOR SMALL BUSINESS

Mobile & Internet Banking

Make supplier payments, transfer funds, pay workers and manage accounts anytime, anywhere.

EFTPoS

Safer, convenient solution for you and your customers. Reduces risk of cash handling and builds financial history.

Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

PLUS - Smart Business Loan

By having a Smart Business Package Account, you can have access to a Smart Business Loan.

BSP Smart Business Package

offers essential products that can help SMEs manage business funds and provides a pathway for growth.

NOW OPEN

BSP SME Business Centre
Waterfront Place Shopping Mall,
Port Moresby.



320 1212 / 7030 1212 - 24/7
servicebsp@bsp.com.pg
www.bsp.com.pg



Lukaut long kainkain drak

Aja Potabe i raitim

I GAT moa long 458 kainkain drak wankain olsem mariwana o spakbrus i stap long Australia, tasol long PNG yumi save long mariwana o spakbrus tasol.

Ditektiv Sajen Clay Butler bilong Australian Federal Polis i tokim ol manmeri long wanpela drak awenes woksop long Pot Mosbi long dispela wik Mande olsem mariwana em i wanpela drak yumi ol manmeri PNG i

save gut long en.

Taim mariwana i wok long bagarapim laip bilong planti ol yangpela manmeri long PNG, wanpela drak ol i kolim ais o metamfitamin i wok long bagarapim moa long 70, 000 manmeri long Australia.

Mista Butler i tok wankain olsem mariwana, i gat ol arapela drak i stap tasol planti bilong ol dispela drak i no save stap ples klia long PNG.

Ol manmeri husat i save kisim drak i no save kisim wan-

pela gutpela samting long en tasol ol i save bagarapim bodi, tingting na laip bilong ol yet.

"Long Australia, metamfitamin o ais em i wanpela bikpela drak. Planti manmeri PNG i no klia gut long dispela drak," Butler i tok.

"Ais em i wok long bagarapim laip bilong planti manmeri Australia. Tude i gat moa long 72, 000 manmeri long Australia husat i save yusim ais."

"Mipela i nau wok long mekim ol awenes i go insait long ol

hauslain na lokol komyuniti long stopim manmeri long yusim ais," Butler i tok.

Em i givim wanpela tok lukaut long PNG bikos sampela manmeri PNG i nau stap long kalabus long Australia bihain long ol AFP polisman i holim ol wantaim ias.

"Ol i yusim PNG olsem tresit point. Tasol mi bilip strong olsem bihain taim ol polisman bai painimaut sampela fektri bilong mekim ais long PNG," em i tok.

Riviu bilong dispela wik...

Ol meri long PNG i gat bikpela namba long kensa long maus - Kantri

OL meri long PNG i gat bikpela namba long gat kensa long maus insait long wol. Dispela em otolarinjoloji o het na nek dokta bilong Australia, Profesa Carsten Palme i tok long 'Petron Dina' i go wantaim 51 Medikel Simposium i kamap long Mosbi long dispela wik.

'Em i wanpela bikpela hevi long PNG, na planti em ol meri,' Profesa Palme i tok.

Em i tok buai em i kamap namba 4 long bagarapim ol pipel bihain long kemikel i save stap long kofi, bia na nikotin long ol smuk, na em i save kamapim kensa long maus na em i wanpela bikpela helt hevi na wari.

Em i tok dispela em tru. Em i tok wanpela rot long abrusim dispela sik em long lusim buai na smuk tu.

Ol PMV draiva bai kisim trening - NCD

OL draiva bilong Pablik Moto Viakel (PMV) na ol kru bilong ol bai kisim gutpela trening na kisim setifiket bipo long ol i wok.

Len trenspot divisen bilong Dipatmen ov Trenspot i tokaut long dispela plen long las wik.

Nesene Kapitel Distrik bai namba wan senta long kantri long karim aut dispela trening bilong ol draiva na kru.

As bilong dispela trening em long luksave olsem ol draiva na ol kru i ken kisim save long level we ol i ken wok long kain senta insait long kantri.

Manus i gat nupela polis hetkwata- Manus

NUPELA provinsel hetkwata bilong polis bai kamap long Manus we bai mani mak olsem K1 milien bai yusim long wokim.

Provinsel Polis Komanda bilong Manus, Alex N'Drasal i tok gavman bilong Australia bai givim mani long dispela projek na bai ol i rausim olpela hetkwata.

Dispela nupela projek bai pinis long Disemba long 2016.

WNBPN i kisim wara long graun - Kimbe

WARA i sot long Wes Nu Briten provins (WNBPN) long dispela strongpela san i mekim na gavana Sasindran Muthuvel long givim mani long digim wel.

Muthuvel i baim SMB Drillers wantaim K30, 800 long bildim ol wel wantaim pam bilong wara long 10-pela hap long Talasea, Kimbe Eben, Mosa na Hoskins.

Em i tok em i mekim olsem bikos wara i laip na em i bikpela samting olsem ol pipel i kisim ol dispela sevis long stap helti.

ExxonMobil PNG i sapotim KKDF

INSAIT long 4-pela yia, ExxonMobil PNG (EMPNG) opereta bilong PNG LNG projek i save go pas long sapotim Kutubu Kundu Digaso Festival (KKDF).

ExxonMobil i sapotim wantaim K29, 000 long helpim long baim ol samting i karamapim wok na ran bilong festival, na karim ol singsing grup.

Olsem 1000 pipel bai raun na lukim dispela anuel festival long Pimaga Viles long Nipa-Kutubu Distrik long Sauten Hailans provins long Disemba 25 inap

long 26.

Komiti bilong KKDF na ol komyuniti i go pas i tok welkam long sapot bilong EMPNG long dispela so.

Siaman bilong KKDF, James Irimaru i tok dispela so bai promotim ol samting bilong bus bai stap longpela taim, tumbuna pasin bilong Kutubu, na promotim sastenebel risos konsevesen o pasin bilong lukautim ol bus, graun na ol samting i stap insait, aninit na antap.

"Em i edukesen program bi-

long ol pikinini na ol yangpela pipel bai noken lusting ting long ol planti kalsa bilong yumi, na yumi i amamas tru long sapot bilong EMPNG," Mista Irimaru i tok.

Long wankain taim, paiplain Supavaisa bilong EMPNG, Lary Adams i tok ExxonMobil PNG i gat strongpela tingting long lukautim narapela kain envairomen bilong PNG na ol tumbuna kalsa bilong ol pipel long bihain.

"Dispela pasin bilong lukau-

tim ol envairomen longpela taim long sait bilong operesen i bikpela samting long PNG LNG projek," Mista Adams i tok.

Em i tok moa olsem dispela festival i givim sans long serim ol kain kalsa bilong rijon na bikpela samting serim toktok bilong konsevesen na bio-daivesiti.

Het tok bilong dispela yia *Preserving our cultural heritage through saving environment* o lukautim ol pasin tumbuna longpela taim lukautim gut envairomen.

BSP tokaut long dividen bilong Oktoba 2015

BIKPELA komesel benk long kantri, Benk Saut Pasifik (BSP) i tokaut long dividen bilong we kampani bai baim long ol seaholda long Oktoba 2015.

Siaman bilong BSP, Sir Kostas Constantinou i tok bot bilong BSP long las wik i tok orait long interim 2015 Fainensel Stetmen long 6-pela

mun i go bek long pinis bilong Jun 2015 we winmani o profit bin sanap long K266.9 milien.

Em i tok dispela i winim profit bilong 2014 na i go antap long 1.7 pesen.

Sir Kostas i tok interim dividen long 22.5 toea long wan wan sea i makim: Gros interim dividen klostu long K105 milien

(K93 milien long 2014; Interim mani bilong main ol sea holda em long resio 39 pesen (35 pesen long 2014); Enuel mani kampani i baim em K7.40 sea prais long 10.6 pesen i wankain long 2014; Taim bilong dividen em: Oktoba 5, 2015, na pemen bai go long ol seaholda long Oktoba 23, 2015.

Sir Kostas i tok benk i gat bikpela luksave long ol seaholda bilong kampani na em bai baim ol winmani we kampani i mekim.

Em i tok benk i gat bikpela wok long mekim long baim ol seaholda wantaim mani kampani i mekim long wanwan yia.



Bagi kar bilong risot...

Sapos yu laik go malolo liklik long Madang Risot, yu no inap abrus dispela liklik kar. Madang Risot i gat bikpela hap tru na ol gest i stap long we tru long rum bilong ol i save kisim dispela bagi na bai ol i draiv isi isi i go long rum bilong ol. Stail tru!

Poto: Jada Wilson



PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

Women and cancer: grounds for growing concern

The Pacific International Hospital invites all to participate in the annual walk "Globeathon," to raise awareness about cervical cancer. The walk will be flagged off from the grounds of Pacific International Hospital on the morning of September 27 a Sunday.

Organized groups are most welcome to please join this globally-synchronized walk and text to the PIH Textline on 7155-8866 for any details. PIH is not charging any fee for participation and t-shirts will be given away.

In light of the heightened concern expressed at the 51st Annual Medical Symposium of the Medical Society of Papua New Guinea, members of medical profession have been calling to "advancing women's health through innovation," the symposium theme, the Pacific International Hospital appeals to the public to be aware of:

"PNG has among the highest estimated burdens of cervical cancer globally" (Dr. Valley)

"It is estimated that 1,500 women die each year from cervical Cancer (in PNG)" (Dr. Goyen)

"The incidence of cervical cancer is quite high in this country... it accounted for 65% of all gynaecological cancer in our Western Highlands Province hospital..." (Dr. Kombuk)

"Cervical Cancer is one of the major causes of mortality amongst the PNG women. The main treatment for Stage 2B to 4A is radiation therapy and chemotherapy" (Dr. Ghimire)

Many papers presented at the symposium made note of the importance of the simple VIA testing, or Visual Inspection of the cervix after Acetic Acid, in getting women screened for HPV infection and detection of cervical cancer.

A few strains of the common Human Papilloma Virus are often cited as the cause of the infection that leads to cervical cancer. Its main transmission is through sexual contact with males who have the HPV.

Pacific International Hospital would like to reiterate the call made in the article two weeks ago **THAT THERE IS NO ALTERNATE TREATMENT PROCESS FOR CERVICAL CANCER THAT IS OUTSIDE OF ANY HOSPITAL SETTING.** As symposium papers would show, the treatments are either by surgery, chemotherapy, radiation therapy



Lynda Babao O'Neill walking in Globeathon 2014, with Dadi Toka Jr. of PNG Cancer Foundation. Lynda Babao O'Neill has confirmed participation in this year's Globeathon, to be held on 27 September 2015 at PIH.

and cryotherapy. All of these are sophisticated procedures that only highly trained medical professionals can do. **NO TREATMENT IS POSSIBLE BY FOOD SUPPLEMENTS OR DIETARY SUPPLEMENTS THAT ARE CLAIMED TO BE "CURES" FOR CERVICAL CANCER.**

Since a number of people seem to be spending their hard-earned cash buying some of these supplements, we encourage them to instead consider being screened through the more definitive method of the PAP Smear Test, available at the Pacific International Hospital and it costs only 150.00 Kina.

Dr. Jonathan Oblefias, head of pathology at Pacific International Hospital, noted that "VIA with HPV screening is a practical method to screening of cervical cancer due to its simplicity and practicability...However, the gold standard in the diagnosis of cervical cancer is still the Pap Smear Test, and if needed, cervical biopsy read by a trained pathologist."

There is also available a vaccination against HPV infection, which has been proven in studies all over the world to be very successful in protecting women against HPV infection. This is the Gardasil vaccine, available at the Pacific International Hospital, and recommended for administration to women

when they are 12 to 16 years of age (mainly preferred to be completed before the individual has any kind of sexual contact).

Dr. Mathias Sapuri, OL, Chief Obstetrician and Gynaecologist of PIH, as well as Deputy Chairman of PIH, stressed that "Gardasil Vaccine is here at Pacific International Hospital. Therefore I encourage all young women in PNG to come to PIH and get vaccinated with Gardasil. Prevention is better than cure in the fight against cervical cancer."

With the availability of VIA or PAP Smear screening, which are relatively cheaper compared to the way other cancers and other diseases could be detected, and, with the availability of a vaccine such as Gardasil which would effectively protect the individual for life from HPV infection, it may be said that cervical cancer by and large is really a preventable matter.

As emphasized by no less than Lynda Babao O'Neill in her speech as the patron of the dinner held at the end of

the first day of this year's Medical Symposium, "...what is upsetting is that many of the deaths of our women are preventable...the top three cancers affecting women: cervical, breast, and mouth cancers can be prevented, again, through awareness programs, medical check-ups, vaccinations, lifestyle choices we make, for example, stop chewing betel nut, stop smoking, reduce alcohol..."

This brings us to another very easily preventable cancer afflicting a large number of people in PNG: oral and mouth cancers, which are caused largely by Betel Nut chewing. As noted by Dr. Carsten Palme from Sydney, "...Oral cavity cancer among women in the world is an uncommon disease, but you can see... of oral cavity cancer in the world, **the world record is held by PNG women**, unfortunately... if you look at the increase rates, they are frightening, oral cavity cancer have nearly doubled in incidence since 2004... that little betel nut, causes about 25,000 deaths per year... health officials in PNG are concerned. It's a massive problem, it's a huge problem, one that's going to get worse... and PNG has the highest incidence rate of oral cavity cancer in women in the world..."

For a nation with a population of just over 7-million, a death rate of 25,000 per year is quite a high number. And that is huge considering it can be changed by simply stopping the habit of chewing betel nut.

So, when you go to Pacific International Hospital on September 27 for Globeathon, please do not bring any betel nut with you. Globeathon may be focused on below-the-belt cancers, but we might as well be consistent that we want to do what we can against these preventable cancers.

Screen yourself annually, be safe in your sexual practices, and get vaccinated. For more information contact Joel on 7155-8866.

LAST CALL!

FREE SURGERIES FOR CLEFT LIP KIDS

FREE SURGERIES FOR CLEFT LIP AND CLEFT PALATE WILL BE HELD IN OCTOBER AT THE PACIFIC INTERNATIONAL HOSPITAL COURTESY OF OPERATION OF HOPE DOCTORS FROM THE U.S.A. IF YOU HAVE A RELATIVE WITH CLEFT LIP, PLEASE SEND PATIENT DETAILS EITHER BY FACEBOOK, LIKING FB PAGE "PIHkinini Smile", OR EMAIL joel_marketing@pihpng.com OR TEXT TO 7155-8866.

2015 sponsors: Bougainville Copper Ltd, Brian Bell, Airlines PNG

Be part of the top-tier facility of your profession!!



Nurses, Midwives, and CHW welcome to apply

send your CV to supriya_hr@pihpng.com or text 7155 8866



Tokura nupela sif bilong Bogenvil polis

OL polisman long Pot Mosbi i tok gut bai long Asisten Komisina Francis Tokura las wik Fraide long Bomana Polis Kolis.

Mista Tokura i lusim Royel PNG Konstabulari (RPNGC) long kisim nupela wok bilong en olsem Sif bilong Bogenvil Polis Sevis.

Polis Komisina Garry Baki husat i bin stap long tok gut bai i tok RPNGC i lusim wanpela sinia polis ppisa husat i gat planti yia ekprens long wok polis.

Komisina Baki i tok

Mista Tokura i bin wok hat tru olsem wanpela polisman nating long sevim pos fos na hat wok bilong en i kisim em i go antap long kamap wanpela sinia polis opisa.

"Mipela bai lusim Mista Tokura tasol moa long 250,000 pipel bilong Bogenvil i nidim em. Dispela em I soim olsem PNG gavman i laik helpim ol pipel bilong Bogenvil long stretim gutpela sindaun bihain long 2020 sapos ol i kisim independens."

"Mi bilip strong tru olsem

Tokura em i wanpela fit man bilong kamap sif bilong Bogenvil Polis,"Baki I tok.

"Tru tumas RPNGC o polis i mekim gutpela wok long stretim sindaun bilong ol manmeri Bogenvil. RPNGC i givim pinis pawa bilong polis long Bogenvil Polis Sevis na mipela I laik wokbung wantaim ol,"Baki I tok.

Em i tok Bogenvil Polis Sevis bai yusim Bomana Polis Kolis long trenim ol polisman bilong en.

Baki I makim maus bi-

long moa long 6,000 polis manmeri long tok amamas long Tokura long hat wok em i bin mekim long planti yia taim em i sevim RPNGC.

"Mi save nupela wok bilong yu bai no inap isipela wok. Bai yu bungim planti salens. Tasol mipela save ol ekprens yu kisim long RPNGC bai helpim yu long mekim nupela wok bilong yu. Yu noken lus tingting long kolim mipela long telefon sapos yu nidim halivim bilong mipela,"Baki I tokim Tokura.

Ol nius manmeri sindaun long woksop

TRENSPARENSI Intenesenel PNG I bin holim wanpela woksop tude moning long skulim ol nius manmeri manmeri long save gut long REDD, klaimet senis na global woming birua.

Plantu manmeri long PNG i no save gut long REDD em i wanem samting. Ol i save tu long klaimet senis na global woming.

Dispela woksop i givim sans long ol nius manmeri long Mosbi

long luksave gut long rot sam-pela rot we pasin korapsen inap long kamap na bagarapim laip long kantri bilong yumi.

"Dispela wokshop bai skulim ol nius manmeri long kisim save long wanem em i klaimet senis na global woming."

"Pasin korapsen i nau wok long kamap long klaimet senis na global woming. Mipela i les long pasin korapsen i bagarapim kantri,"TIPNG i tok.

Ol Sekenderi skul long NCD i kisim kompyuta



Gavana Parkop i opim ol nupela teblet o liklik kompiuta.

Ol sumatin long Kila Kila Sekenderi skul wantaim Gavana Powes Parkop bihain long opening bilong ol liklik kompiuta.

Esther Bralyn Wani i raitim

OLGETA Sekenderi skul insait long Nesenel Kapitel Distrik (NCD) i gat sans long kisim wan wan ol liklik kompiuta we Gavana bilong NCD, Powes Parkop i bung wantaim Digicel na givim. Kila Kila Sekenderi skul insait long Pot Mosbi i namba wwan long kisim ol dispela kompyuta long Tunde.

Gavana Parkop i baim 10, 500 liklik kompyuta long mani mak olsem K3.7 milien insait long Provinsel Sapot Impruvmen Pro-

gram (PSIP).

Long wankain taim, em i lukim bikpela hol bilong Kila Kila Sekenderi i bruk na em i promisim ol wantaim K2 milien long stretim skul bilong ol.

Prinsipel bilong Kila Kila Sekenderi, Herman Panai, i tok dispela ol kompiuta bai givim strong long ol sumatin na wantaim nupela Nesenel Edukesen Rifom em bai helpim ol sumatin.

"Dispela liklik kompyuta i bikpela samting long skul taim em i no isi long bildim wanpela laibri o baim ol ensaiklopedia na tenkyu gavana

long ol dispela kompiuta," Mista Panai i tok.

Long wankain taim, Dairekta Gavman Rilesens bilong Digicel PNG, Gary Seddon, i tok em i amamas long wok wantaim gavana long bihainim driman bilong em long inves long ol yut long gutpela bilong kantri long bihain.

"Edukesen em i as bilong olgeta samting long soim yu bai kamap olsem wanem bihain. Kisim long ol tisa planti samting yu ken kisim."

"Ol dispela kompiuta bai go wantaim lainim bilong yu, em bai helpim yu long ol stadi bilong yu. Em bai

soim yu rot long planti save. Yusim dispela samting long gutpela bilong yu long bihain na noken yusim long ol no gut wok," Mista Seddon i tok.

Long pinis bilong dispela opening, Gavana Parkop i tok i gat ol hevi i stap tasol bikpela samting em olsem intanet i kam long hia long stap.

"I gat ol problem bilong em tasol em i gat gutpela sans long givim strong long lainim nupela samting,"

Gavana Parkop i tok.

Em i tok insait long longpela taim bai ol i kisim Visen 2050 long kamap smat na pasin bilong skelim samting gut.

Gavana Parkop i tok tenkyu long wok bung wantaim Digicel PNG bikos trupela mani mak bilong ol liklik kompiuta bai inap long K7 milien tasol wantaim sapot bilong Digicel PNG kos i kam daun long K3.7 milien.

Kali: Sevim mani, noken kisim nupela wokman

SEKETERI bilong Dipatmen ov Pesenol Menesmen, John Kali, i stopim ol gavman dipatmen na stet ejensi long no ken kisim nupela wok manmeri long wok pablik sevan.

Kali i tok gavman i sot long K300 milen long ranim ol gavman dipatmen na i no gat mani long kisim nupela wokman i kam insait long

pablik sevis.

Em i tok dispela bai larim gavman i kisim gutpela tingting long kamapim nesenel baset bilong neks yia.

Kali i salim i go aut pinis wanpela pas i go aut long ol dipatmental het, provinsal administreta na arapela ol bos bilong stet ejensi husat i save kisim mani long gavman long noken

kisim nupela wokman.

"No ken kisim nupela pablik sevis wok manmeri. Mipela i laik sevim mani. No ken senisim wok straksa bilong dipatmen tu,"Kali i tok.

Em i tok olgeta gavman dipatmen i mas rausim ol giaman wokman husat i no save wok, tasol stilim mani bilong gavman, na tu, sekim gut amas mani i

stap long ranim gut ol gavman dipatmen.

"No ken larim ol wok manmeri i yusim gavman kar long wiken na nait. No ken larim ol wokman i kisim giaman ovataim long wok,"Kali i tok.

Em i tok dispela bai larim gavman i lukautim na yusim gut mani we em i bin makim long 2015 nesenel baset.

BAIM



tude!

Em i K1.00 tasol!!

UN i no amamas long soseri vailens

YUNAITET Stet (UN) sistem long Papua Niugini (PNG) i no amamas long ol i paitim tupela meri nogut tru long Sauten Hailans taim ol i sutim tok long tupela long pasin sanguma.

Ol wankain stori i kamap long nius long Lahir na Nu Ailan provins. Dispela ol pait i save bagarapim rait bilong wanpela long laip na i no gat rispek. Em i brukim Nesenel Kontitusen bilong PNG na intanesenel human rait na Konvensen long Iliminesen bilong Olgeta kain Diskriminesen Egensim Meri (CEDAW).

UN sistem i laikim ol PNG atoriti long

mekim eksen hariap long lukautim na givim medikel na sapot sevis long sait bilong tingting long ol pipel i kisim bagarap long sutim tok bilong pasin sanguma.

Ol i tok mekim wok painim aut hariap na kalabusim husat i paitim ol na lo na jastis sekta mas kisim i go long kot bai i kirapim gen pasin bilong tras long lo.

UN sistem i amas long ol polis na ol narapela husat i go pas long lukautim ol pipel i kisim bagarap long pasin bilong sutim tok long sanguma pasin na gavman long go pas long Soseri Nesenel Eksen Plen (SNAP).

2017 ileksen bai narapela kain

NESENEL Ileksen long 2017 bai narapela kain olgeta, i no olsem 2012 Nesenel Ileksen.

Ilektoral Komisina Sir Andrew Trawen i mekim dispela toktok long Maun Hagen long dispela wik taim Ilektoral Komisin i bin holim wanpela bung bilong ol ri-jinol ileksen menesa na asisten ileksen menesa.

Sir Andrew i tok ol ileksen menesa na asisten ileksen



Elektoral Komisina Andrew Trawen.

menesa long s7-pela hailans provins i mas plen gut na sanap strong long karimaut ileksen long yia 2017.

"Long yia 2017, ol save bilong ol manmeri bai go antap moa. Na ol bai tingting long abrusim ol sistem bilong Ilektoral Komisin long ranim fri, fea na seif ileksen," Sir Andrew i tok.

Loya bilong Ilektoral Komisin, Ray William, i tok wanpela rot bilong ranim ileksen gut na abrusim ol paul pilai em long larim ol yangpela manmeri i mekim ol wok bilong ritening opisa na asisten ritening opisa long 2017 Nesenel Ileksen.

"Ol ritening opisa mipela i save kisim long taim bilong ilek-

sen i save mekim paul pilai," William i tok.

Tasol ol yangpela manmeri i no save gut tru long pilaim paul pilai na mekim ol arapela pasin korapsen long ileksen taim, em i tok.

William i givim tok lukaut long Ilektoral Komisin long abrusim ol kendidet husat i laik putim ol sapota o lain bilong ol long kamap ritening opisa na asisten ritening opisa long ileksen taim.

"Ol politisen na kendidet bai yusim bikpela mani stret long 2017 ileksen taim. Yumi mas redi gut tru long abrusim paul pilai ol i tingting long yusim mani na mekim," William i tok.

BSP strongim Lidasip na Menesmen Ekseketiv



L-R_ BSP Keria Developmen Menesa, Hitolo Galamo, ol lain bilong go wok ovasis, Kili Tambua, Kami Gawi, Merolyn Samson na Grup Deputi CEO, Johnson Kalo.

TRIPLELA nupela lida lain bilong Papua Niugini husat i wok wantaim BSP benk bai i go long wok wantaim Benk bilong Filipin Ailan (BPI) inap long tripela mun long lainim ol nupela we na save bilong wok long benk.

Kili Tambua, Merolyn Samson, Kami Gawi i stap insait long namba tri grup bilong ol wokman na wokmeri bilong BSP benk i salim go long Filipins aninit long dispela BSP Lidasip na Menesmen Developmen Program (LMDP). Ol bai stat wantaim BPI long Septemb 7 i go long Novemba 27. Stat long 2013 BSP benk i wok long salim 6-pela wokman na meri i go long kisim skul aninit long dispela Lidasip na Menesmen Developmen Program.

BSP Grup Deputi CEO, Johnson Kalo, i tok klia olsem luklik bilong benk em long kamapim gut wok bilong sels na sevis. Long kamap long dispela mak bilong benk i mas investim mani i go long namba wan asset bilong em, na em i human risos o wokman na meri. LMDP em i bilong givm gutpela tingting na bringim ol wokman na meri i go long mak bilong kisim wok bilong senia na ekseketiv lidasip insait long benk.

Wok wantaim BPI bai helpim ol lain i kisim trening long kamapim gutpela save na mekim ol i lukim ol samting long narapela kain we wantaim nupela kalsa na wok bihainim ol intenesenel standet.

Olgeta tripela wokman na meri i gat bikpela amams long benk i wokim dispela long laip bilong ol.

Mis Gawi, Bisnis Kontrola wantaim Koporet Stratejik Bisnis Yunit i tok, "Dispela em i sans long kisim sampela aidia long ol gutpela kain we bilong wok long wanpeal intenesenel benk na tu long helpim mi long kisim moa save long lidasip na menesmen".

Miss Samson, Het ov Intenesenel Operesen tu i mekim wankain toktok olsem, "Dispela em i sans tru long lainim narapela kain ol we bilong menesmen na long lukluk moa long objektiv bilong program".

Mista Tambua, Deputi Jeneral Menesa bilong Ritel Benking i tingting strong olsem, "Dispela program em i wanpela rot we bai senisim pasin na mekim ol Papua Niugini man na meri long go moa long ol ekseketiv level na kisim dispela benk i go long bihain taim.



Nupela haus bilong ol helt wokman long Tutam Et Pos we minista bilong woks na memba bilong Imbongu, Fransis Awesa i bin opim las wik. Foto: Opis bilong Minista bilong Woks.

Puma Energy i pasim dua na sotim bensin long siti

Bomana Koreksenel Sevis mas wokim wanpela haus lotu

Frieda Sila Kana i raitim

WANPELA Asisten Komisina bilong Koreksenel Sevis i bin mekim singaut long ol opisa bilong Koreksenel Sevis na ol famili bilong ol long ol i mas tingting strong long kirapim wanpela intedinominesenel haus lotu insait long CS long Bomana.

Aisten Komanda Heka Hailans Rijn i bin mekim dispela toktok long taim bilong Kantri i tanim bel na tingim kavanen de long 26 Ogas las wik. Mista Heka i bin tok olsem Bomana Haus Kalabus em i bikpela haus kalabus insait long kantri tasol nau yet em i no gat wanpela bikpela kibung haus olsem haus lotu.

“Wanem samting bai kamap sapos wanpela kalabus man i dai o wanpela opisa i dai. Bai yumi holim lotu bilong em long wanem haus lotu o haus bung? Ol bai putim bodi bilong yu long we?” Mista Heka i askim.

Em i tok, i gat ol wan wan lotu i stap insait long banis na i wokim wan wan haus lotu bilong ol yet long strong bilong ol yet na em i gutpela samting. Tasol em i tok, bilong wanem na CS yet i no gat wanpela haus we ol inap kam bung long en long lotu na mekim prea.

Long dispela taim bilong Ripentens na Kavanen de, Komisina bilong Koreksenel Sevis, Michael Waipo wantaim ol Asisten Komisina bilong em na olgeta famili bilong ol i bin go bung insait long bikpela kompaun eria bilong Bomana haus kalabus long mekim luksave bilong dispela de.

Ol i bin askim Mista Heka long pasim prea tasol em i mekim dispela toktok bilong CS Bomana i mas gat haus bilong kibung pastaim long em i mekim beten bilong pasim de.

Mista Heka i tok moa olsem, wanpela bikpela Koreksenel Sevis Komisina, leit Pius Kerepia i bin katim wanpela hap graun na i makim pinis long wanpela bikpela kibung haus bai kirap olsem haus lotu tasol long planti yia i no gat wanpela wok i kamap long dispela yet.

Em i tok, olsem em yet na meri bilong em i statim pinis wanpela liklik fanresing projek long kirapim haus lotu bilong haus kalabus long Bomana. Na em i tok olsem long Sande bai dispela fanresing i stat.

Frieda Sila Kana i raitim

TAIM fiul i sot long Pot Mosbi em i save kamapim wankain hevi tasol olsem long taim ol PMV bas i save straik na i no save ran long ol rut o rot bilong ol.

Long kain taim olsem, ol pipel long Pot Mosbi siti i save kisim taim stret long go i kam na planti lain i save kamapim ol longpela lain long ol hap bilong fiul stesin o long rot.

Long Mande na Tunde olgeta kar i bin wokim lain long ol Puma Energy Sevis Stesin

i go bihainim rot olsem tupela kilomita long olgeta hap bilong siti na dispela i mekim planti lain i no go kamap long haus hariap.

As bilong dispela hevi kamap long dispela wik em ol niuslain i painimaut olsem Puma Energy i tok kampani i no kisim ol peimen bilong en long gavman na ol i no gat inap mani long baim moa fiul long salim olsem na ol i pasim rifaineri long Napa Napa.

Tasol Praim Minista Peter O'Neill i salim wanpela nius long aste i go long midia

olsem ol pipel i no ken wari nating na ran i go i kam. Em i tok olsem i gat ol narapela rot bilong kisim fiul i stap olsem Mobil Oil we ol inap long saplaim fiul.

“I gat inap saplai bilong fiul bai kam long ol narapela fiul kampani taim ol bai bringim moa fiul i kam long Pot Mosbi,” Mista O'Neill i tok.

Mista O'Neill i tok, ol ples bilong kisim fiul bai sot bikos ol Puma Sevis Stesin i pas, tasol ol man i mas stap isi na wet long kisim fiul. Olsem na em i tok long ol pipel i no ken wokim ol longpela lain long

rot na pasim rot bilong ol fiul tenk long go insait long ol sevis stesin long saplim fiul.

Ating dispela em i gutpela long hetman bilong kantri yet i givim tok bel isi long ol lain i save ranim ol liklik kar we i save yusim bensin na tu long ol pipel long ol i no ken wari. Tasol planti kampani i wari long wanem ol i save gat kontrak wantaim Puma Energy long yusim ol kredit kat long kisim bensin. Dispela i karampaim ol kain lain olsem polis dipatmen we i gat bikpela wok long lukautim lo na oda long siti.

Saina putim ai long PNG

PRESIDEN bilong Saina i putim ai long PNG bikos ol risos bilong dispela kantri i ken helpim Saina long kamap namba wan kantri long mani pawa sait.

Presiden Xi Jingpang i bin bungim Gavana Jeneral Sir Michael Ogio long Beijing aste na tokim dispela toktok.

Presiden Jingping i tok PNG em i bikpela treding patna bilong Saina na dispela poroman namel long tupela kantri i wok long gro i go

antap long hai level.

“Saina i gat bikpela invesmen long LNG projek, Ramu Nikel projek na ol arapela invesmen long PNG. PNG i pulap long nesural risos na mipela i gat industrial risos.

“Mi laikim tupela kantri long sainim wanpela frit red agrimen long larim bisnis na tred namel long tupela kantri i go het yet,” Presiden Jingping i tokim Sir Michael Ogio.

Sir Michael i tokim Jingping olsem PNG em i welka-

mim Saina long kam mekim bisnis long PNG.

“Kantri bilong mi pulap long kainkain risos. Mi laikim planti manmeri Saina long kam mekim bisnis long PNG. Ol Saina i save mekim bisnis gut long PNG na ol manmeri PNG i save amamas long Saina manmeri,” Sir Michael i tok.

Sir Michael i tok PNG i gat planti ges na wel risos na em i tokim Presiden Jingping long larim ol petroleum kam-

pani long kam mekim bisnis long PNG.

Presiden Jingping i tok Saina i gat K44 milen long givim long ol liklik Pasifik Ailan kantri.

“Mi laikim PNG long kisim skel bilong en. Dispela mani i ken kirapim ples na senisim kantri bilong yu,” Presiden Jingping i tok.

PNG luksave yet long Wan Saina polisi bilong Saina, Ogio i tok.



Ol woda man na meri na ol kalabus man na meri i bung long pre long olgeta CS opisa na ol kalabus Poto: CS Midia

2015 Pasifik Ailan Lidasip Program i kisim helpim long U.S

PABLIK Afes Tim long U.S Embasi i amamas long bungim tripela lain husat bai stap insait long Pasifik Ailan Lidasip Program (PILP) long dispela yia.

Dispela PILP Felosip em i tingting bilong Is-Wes Senta sponsa program ol i kamapim long givim sans na strongim lidasip bilong wan wan long ol Pasifik Ailan rijon, na bildim netwok bilong ol yangpela lida husat bai strongim long-pela pren namel long ol pipel long Pasifik, Esia na Yunaitet Stets.

Ol tripela lain em, Panason Talifai na Ednal Palmer bilong Solomon Ailan na Debbie Drorit bilong Papua Niugini bai go long Hawaii na Taiwan long

tripela mun lidasip program.

Bai ol i lukluk long developim save bilong ol Pasifik rijon, ol hap bilong lidasip, na ol rijinol netwok long strongim bung bilong ol lidasip long lainim projek developmen long skul bilong Is-Wes Senta yunivesiti long Honolulu long Hawaii. Bihain bai ol i go long Taiwan na mekim wanpela mun fil stadi long Institut bilong Diplomesi na Intanesenel Afes.

Long tripela yia, PILP Felosip i givim strong long 125 yangpela lida long Pasifik Ailan rijon long karim aut lidasip na promotim wok bung long kalsarel, jiograpikel, na ol institusen envairomen.

Dispela program i save painim husat i gat gutpela save, bikipela strong long lidasip, na i gat bikipela tingting long developim nid bilong ol kantri bilong ol.

PILP Felosip bai strongim save bilong husat i stap insait na save gut long ol ikonmik, sosel, politikel, helt, edukesenel, na ol envairomen isu i givim hevi long rijon, na givim ol strong long groim ol lidasip skil, na luksave long ol netwok insait long rijen long wok bilong ol.

Dispela Is-Wes Senta i promotim gutpela pren na pasin bilong save gut namel long ol pipel na ol kantri bilong Yunaitet Stet, Esia na Pasifik long bung stadi, risets na toktok.



Sampela ol pipel long dispela Australia Awat

I gat 124 skolasip

GAVMAN bilong Australia i amamas long givim 124 skolasip long ol pipel long Papua Niugini long stadi long Australia long 2016.

Dispela i putim PNG long sampela ol bikipela yunivesiti long wol bai givim ol pipel long PNG wanpela sans long kisim kwilfikesen bilong Australia we bai givim ol save long go het long developim kantri.

Ekting Hai Komisina bilong Australia long PNG, Bronte Moules, i tok moa olsem hap bilong dispela awat i bilong ol meri.

"Givim ol wankain sans long ol meri long stadi long Australia em i bikipela rot long kamapim pasin bilong wok wankain long developmen bilong Papua Niugini," Mis Moules i tok.

Ol pipel i slip na wok long ol

provins i kisim strongpela mak long ol sumatin, na 8-pela awat em bilong ol pipel wantaim disability.

"Dispela i gutpela nius bilong PNG bikos ol Australia Awat i givim strong long ol pipel long kain kain wok long edukesen long kamapim senis long bihain bilong kantri," Mis Moules i tok.

Ol skolasip i save wankain wantaim ol namba wan sekta taim gavman bilong PNG na Australia i wanbel, olsem helt, edukesen, gavanens na infrastraksa.

Ol Australia Awat i save promotim save, bungim edukesen na kamapim wok pren namel long Australia na PNG na em i promis bilong gavman bilong Australia long givim sans bilong edukesen long mekim gut ol level bilong ol

pipel na kirapim ikonmik long gro.

Aplikesen bilong Australia Awat Skolasip long stadi long Australia long dispela yia. Ol meri, ol pipel wantaim disability na pipel i slip na wok long provins i ken aplai.

Dispela Australia Awat – PNG Infomesen Senta i gat ol institusenel hanbuk na gat intanet long helpim ol pipel husat laik aplai long mekim risets long ol kos, laikim helpim long ol aplikesen na helpim alumni long painim ol posisen we ol i ken putim ol skil, save na ol lidasip bilong ol.

Senta i stap long Pot Tawa, Hunter St, long Pot Mosbi, na i save op long Mande inap Fraide long 8 klok long moning inap hap 4 long avinun.



Pablik Afes Tim bilong U.S Embasi wantaim ol tripela husat i stap insait long PIPL 2015.

2, 000 pikinini bai stap insait long Kalsarel Wik

DISPELA wik bai lukim 2, 000 skul pikinini long Pot Mosbi Netsa Pak long stap insait long ogenaiesesen edukesen 'kalsarel wik' program.

Long namba tu yia, dispela program bilong ol skul grup bai lukim ol sumatin i pinisim edukesen raun insait long pak na lukim ol infomesen tebol, ol so bilong ol dro na ol pein, ol tumbuna stori na ol narapela samt- ing bai lukluk long tupela het tok, 'wanem em kalsarel konsevesen? na bai mi lukautim ol kalsa stap longpela taim na lukautim ol wail laip olsem wanem?'

Edukesen Supavaisa bilong Pot Mosbi Netsa Pak, Amos Babaga i tok, "Dispela em narapela kain edukesen program long wanem, em i lukluk long hamaspela ol pasin tumbuna long lukautim na larim ol neserel envairomen na wail laip i

stap longpela taim."

Trenspot Dipatmen bilong Nesenenel Kapitol Distrik Komisn (NCDC) i sapatim dispela program na bai helpim long karim ol sumatin long ol wan wan skul bilong ol i go long Netsa Pak long luksave olsem dispela program i bilong olgeta skul na sumatin i stap insait.

Pot Mosbi Netsa Pak bai go pas long PNG Anuel Turisim Ekspo '2015 Lukim PNG nau' long Sande 27 Septemba long ol pablik we PNG Turisim Promosen Atoriti na PNG Turisim Industri Asosiesen i wok bung wantaim long kamapim.

Olsem 35 moa PNG Turisim bisnis long kantri bai soim ol prodak bilong ol long ol Hotel, ol balus kampani, tua operesen na ol ples we ol turis i ken go lukim. Bai gat ol fri samt- ing olsem ol prais, na prais i go daun long ol turisim pekes.



Ol sumatin i bin stap insait long Kalsarel Wik.

EXXONMOBIL PNG helpim 2015 Medikal konprens

EXXONMOBIL PNG (EMPNG), kampani we i go pas long PNG LNG projek, i givim pinis K50,000 long saptim 2015 medikal symposium o konprens i kamap insait long dispela wik long Caritas Komyuniti Haus long Nesenel Kapital Distrik.

Em i namba wan taim long 50 yia laip bilong Medikal Simposium long ol Meri Dokta Asosiesen (WDA) i go pas long holim namba 51 Eneul Medikal Simposium, pas-taim ol tingting long holim long Gateway Hotel long Pot Mosbi tasol nau ol i senisim i go long Caritas Teknikal Skul Miting Haus long Pot Mosbi.

Konprens i bin stat long 30 Ogas na i pinis long Septemba 2.

Bikpela tingting bilong dispela namba 51 simposium em long **Advancing Women's Health Through Innovation** na em i bilong kamapim wanpela pletfom long helpim ol helt bilong ol meri

long Papua Niugini tude.

Ol meri insait long PNG i no save kisim gutpela lukaut olsem na planti hevi i save painim ol mama long taim bilong ol i bel o laik karim pikinini na tu ol i no gat rot long kisim famili plening. PNG Nesenel Dipatmen bilong Helt i gat mak olsem 5-pela meri i save dai olgeta de long taim bilong karim pikinini.

Long taim bilong givim sek i go long WDA, EMPNG Deputi Pro-daksen Menesa, Dale Pittman i tok EMPNG i amamas long saptim dispela bikpela konprens we bai ol saveman na meri bilong helt i kam na toktok long ol kain kain hevi bilong helt bilong ol meri.

"EMPNG i luksave long bikpela wok ol meri dokta asosiesen i save mekim long kamap maus bilong ol memba bilong ol long helt sekta na long ol komyuniti bilong PNG," Mista Pittman i tok.

Namba wan meri long kamapim

WDA, Dokta Nora Dai, i tok tenkyu long Mista Pittman na em i tok, helpim bilong EMPNG i kamap long taim stret.

"WDA i luksave long dispela gutpela saptim bilong EMPNG bikos em i bihainim ol kain wok i kamap long wol tude long sait bilong helpim na strongim laip na wok bilong ol meri, Dokta Dai i tok.

"Dispela i karamapim rait bilong ol bikpela meri na ol yangpela meri long kisim na amamas wantaim namba wan kain heltke," em i tok.

"Bikpela toktok bilong dispela yia em i lukluk long helt bilong ol meri bikso mipela bilip olsem taim yumi helpim ol meri long helt bilong ol, em yumi helpim helt bilong kantri olsem na visen bilong mipela em i tok, 'Helti Meri, Helti Kantri.'" Dokta Dai i tok.

Moa long 600 dokta na ol helt wokman na meri i kamap long dispela bikpela kibung long dispela wik. Sampela i kam long arapela kantri tu i stap.



Namba wan Meri Dokta long WDA i kisim sek long Mista Pittman bilong EMPNG.

PNGMRI tokaut long nupela awot long matenel helt

PNG Nesenel Medikal Risets Institut (PNGMRI), i tokaut long wanpela nupela risets awot gren bilong helt bilong ol meri long dispela wik insait long namba 51 Eneul Konprens bilong ol PNG Medikal Sosaiti.

PNGMRI i bin kisim mani gren aninit long Join Global Helt Trials inisetiv long mekim wok painim aut long ol hap we ol helt lain i save wokim tes na givim marasin stret olsem long ol ples bilong klinik bilong ol mama.

Wok stadi bai kamap long painim aut moa long ol kain sik we i save kamap long taim man na meri i slip wantaim.

Ol i makim dispela stadi long kamap long hap we ol pipel i no gat planti mani tumas long lukautim ol yet long sik bilong ol.

Bikpela tingting bilong dispela

risets o stadi em long traim long daunim sampela hevi bilong ol mama long taim bilong kisim bel na long karim pikinini.

Dispela wok em i kamap long Yunaited Kingdom (UK) we Dipatmen bilong Intenesenel Developmen Medikal Risets Kaunsil UK na Wellcome Trust i saptim wok bilong ol kain bikpela risets olsem.

"Dispela intenesenel gren awot i gat nem olsem na em bai putim ol risets opisa bilong PNG long pas lain global risets bilong ol bikpela sik we i save kalap long narapela na long helt bilong ol mama," Profesa Peter Siba, Dairekta bilong PNGIMR, i tok.

Dokta Andrew Vallely, Profesa Risets Felo na Dokta William Pomat, Deputi Dairekta, bilong Saiens long PNGIMR bai go pas long traim ol dispela wok painimaut

bilong risets wantaim 20 senia risets opisa na ol saveman na meri long helt bilong kamapim pikinini husat i save stap long PNG, Australia na Yurop.

Tripela bikpela dokta bilong ol meri long kantri, Dokta Grace Kariwiga bilong Alotau Haus Sik, Profesa Gren Moa bilong Yunivesiti bilong PNG/Pot Mosbi Jeneral Haus sik, na Profesa Peter Siba bilong PNGIMR bai wok wantaim dispela PNGIMR tim.

Dispela stadi bai lukluk long wanem hap ol i sot yet long save gut long ol dispela sik i save kamap long ol man meri we i save bagarapim mama long hap bilong karim

Ol i save olsem sampela sik we i save kamap long taim man na meri i slip wantaim em i ken kamap orait wantaim marasin, tasol ol i save tu olsem ol i save painim hat long tok

stret long em i wanem sik bikos sampela em ol i ges tasol long taim ol i lukim sampela kain sain bilong sik.

Sampela risets long pastaim i lukim olsem sik long ol lek sangana bilong man na meri olsem klamidia, gonoria na ol narapela kain sik i save bagarapim ol mama i gat bel sapos ol i no kisim marasin hariap.

Em inap long bagarapim pikinini taim mama karim na i ken mekim pikinini bai i no gat bikpela hevi.

Nau i gat nupela kain samting i stap pinis long man o meri i ken sekim em yet sapos sik em i gat em i wanpela bilong ol STI o no gat na dispela em ol helt wokman na meri i ken yusim long ol taim bilong klinik bilong ol mama.

Dispela masin bilong wokim risets bai inap long helpim ol helt wokman na meri long givim stori bi-

long sik bilong ol meri long wankain taim yet long taim ol i mekim tes long wanem hap klinik i stap.

"Dispela kain rot bilong wok em bai helpim ol mama i gat bel gut tru long ol kain kantri olsem PNG.

Em samting mipela i laik painimaut long dispela traim risets bilong mipela," Dokta Vallely, Prinsipel investigeta bilong stadi i tok.

Dispela wok bilong traim bai kamap long 12-pela ples bilong klinik bilong ol mama insait long tripela provins long PNG nae m bai kamap insait long 4-pela yia.

Siaman bilong PNGIMR Kaunsil, Profesa Sir, Isi Kevau i tok amamas long IMR tim long ol i kisim luksave long kisim dispela awot long mekim dispela bikpela risets gren.



Minista bilong Woks na Memba bilong Imbongu, Francis Awesa I katim ribon na Distrik Etministreta bilong Mendi, Joe Kaiyo i lukluk taim ol i opim haus bilong helt wokman bilong Tutam Et Pos. foto: Opis bilong Minista bilong Woks

5 milien long Esia-Pasifik kisim sik TB long wanpela yia

OL Palamen memba bilong dispela rijon i bin kamapim wanpela Esia Pasifik TB Kokas, long wanpela miting long Sydney, Australia long strongim wok bilong daunim sik TB long rijon.

Ol helt ripot i tok olsem i gat 60 pesen bilong ol sik TB em i save kamap long Esia Pasifik rijon we 5 milien pipel i save kisim sik long olgeta yia. Narapela strongpela kain TB, we i save daunim strong bilong ol marasin MDR i wok long kamap moa yet na dispela em i stap olsem wanpela samting we inap long bagarapim helt bilong planti pipel long wol.

Ol deliget i kam long India, Vietnam, Filipins, Indonesia, Papua Niugini, Nu

Silan na Australia long kamapim dispela palamen rijonal netwok aninit long Global TB Kokas long namba wan taim stret.

"Ol i kamapim dispela Kokas wantaim bikpela tingting olsem taim olgeta lain i wok bung na i abrusim ol mak bilong graun ol gavman, em i ken kamapim bikpela senis," Wanpela memba bilong palamen bilong Australia, Warren Entsch, husat i narapela siaman tu bilong Esia Pasifik TB Kokas i tok.

Mista Entsch i tok, sapos ol gavman i no hariap long mekim samting, drag risisten TB bai kilim 40 milien pipel moa insait lng rijon bilong yumi, insait long narapela 35 yia na em inap long bagarapim tu ikonomi bilong

yumi. Ol memba bilong Esia-Pasifik TB Kokas i tok promis long mekim wok olsem wanpela bodi long wok bilong daunim sik TB taim ol i wok wantaim ol narapela nesenel palamen memba long rijon na long wol na tu wantaim ol global ogenaisesen long kisim inap helpim long kamapim na strongi ol polisi we bai karim ol risos bilong mekim gut wok i go.

Dispela Esia-Pasifik TB Kokas i gat tingting long saptim ol siklain na ol famili bilong ol we i no inap long helpim o lyet long rausim pasin bilnog ol narapela i lukdaun na baisim ol. Dispela i bihainim tingting bilnog Stop TB Patnasip Global TB Plen 2016-2020 na Inog End TB strateji 2016-2035.

Kamapim bisnis long maket

ANINIT long kol ples ol liklik maket i save kamap sait long ol bas stop long Lauktoka long Fiji, ol i save salim ol kaikai long gaden, ol frut, ol kaikai long graun na ol i save mekim liklik maket i bisu.

Namel long ol, Lidia Vilaiwaqa i save salim ol beg bilong yangona long statim liklik tabel maket bilong em.

Mis Vilaiwaqa i bin stap insait long dispela maket long 7-pela krismas taim man bilong em i lusim wok. "Mi save kam long haus wantaim mani bilong wanpela de na planti taim mi save givim long ol pipel long komuniti husat i save nidim na kam long mi, kerekere long Fiji, yu save," em i tok.

Em i tingting long opim dispela maket bilong em na em i bin stap insait long wanpela trening we UNDP na Westpac i wok bung long givim ol meri.

Dispela trening sesen i kamap long maket bilong ol meri long Lautoka na givim ol maket meri wantaim tingting



Lidia Vilaiwaqa wantaim ol kastoma long haus maket bilong em.

na ol save long mekim gut na toktok wantaim ol kastoma.

Em i bin namba tu sesen long Kontinuing Bisnis Maket Edukesen (CMBE) program bihainim het tok long 'Besik Fainsel Litresi' i bin kamap long Lae. Olsem 120 maket lain i bin stap insait long dispela trening program.

Ol meri i kamapim olsem 75 inap 90 pesen bilong ol maket long ol kastoma wantaim smail.

Mi save mekim save olsem maket hap bilong mi i luk nais

CMBE i save givim gutpela trening, spes na ol toktok long mekim gut na strongim fainensel litresi prektis bilong ol maket lain olsem ol meri.

Mis Vilaiwaqa i tok, "Mi lainim long trening olsem baset na seving em bikpela hap bilong mekim bisnis.

Em i bikpela samting long bilasim gut maket haus na toktok long ol kastoma wantaim smail.

Mi save mekim save olsem maket hap bilong mi i luk nais

na klin na ol kastoma bilong bai pilim gut."

Sampela taim em i save salim 35 kilogram bilong ol yangona long wanpela wik. Em i save mekim rekot long liklik buk, hamas em i baim, hamas long paitem na trenspotim, na total bilong salim long wan wan wik.

Em i tok moa olsem em gutpela long lainim nupela samting olgeta taim na bihainim long wanem yu ken developim bisnis gut tru.

Ol yangpela meri i ken joinim MPIP

Esther Bralyn Wani i raitim

MIS Pasifik Ailan kwin resis (MPIP) 2015 i op bilong ol yangpela meri husat i laik sanap long resis long Disemba 5 inap 13 long Cook Ailan.

Ol i senisim olpela nem bilong ol, Mis Saut Pasifik Pejen' i go long 'Mis Pasifik Ailan bilong PNG'.

SiAmeri bilong dispela resis, Kathy Johnson i tok dispela nem senis i soim rijen, we bai i kamapim wanpela hap bilong lukluk long kalsa bilong ol yangpela meri.

Em i tok ol yangpela meri i ken save long ol tumbuna kalsa bilong ol na dispela i ken givim strong long ol yangpela meri.

Em i tok moa olsem i gat 110 skolasip bilong ol fainel yia sumatin tu long dispela.

Ol i tok tenkyu long olpela petron bilong MPIP, Lady Carol Kidu i bin stap olsem petron bilong ol long 4-pela yia.

Long wankain taim, meri bilong Praim Minista, Linda O'Neil i kamap nupela petron bilong MPIP bihain long Lady Carol Kidu.

Misis O'Neil i tok dispela resis em i gutpela bilong ol yangpela meri long bildim o kamapim ekspiens na long givim ol tingting olsem ol i impoten.

Ol i askim husat yangpela meri namel long 18 na 26 krismas long joinim sapos yu gat intres o salim toktok long wanpela yu save long en. Yupela ken sekim aplikesen fom bilong ol long fesbuk o sekim ol long Haus ov Gemini long Brian Bell Hom Senta long Gordons.



Ol opisa bilong Mis Pasifik Ailan Pejen (MPIP).

Nupela petron bilong MPIP, Linda O'Neil long lonsing bilong ol.



Haus Ruth i tok tenyu long Australia

TIM bilong Australia long Pasifik Gems i givim ol gutpela samting o presen taim gem i pinis long las mun.

Taim ol pilaia long Australia i laik go bek wantaim planti ol gutpela memori, ol i luksave olsem ol ekstra samting bilong ol i go long ol hap we i nidim ol samting stret.

"Mipela i harim stori bilong Haus Ruth pinis na ol gutpela wok ol i save mekim long givim seif hap bilong ol meri na pikinini long Pot Mosbi husat i kisim taim long vailens long laip bilong ol," Sef de Misin bilong Australia, Malcolm Page i tok.

"Long dispela, mipela i amamas long givim ol samting, ol blanket na besit, ol tauwel, ol sia



Ol presen tim Australia i givim long Haus Ruth.

na tabel, na ol pilo long kain gutpela wok," Mista Page i tok.

Ol wokman na meri bilong Ruth Haus husat i save sapatim nupela Children's Crisis Centre i amamas na putim ol nupela ol taiga mak blanket long na ol bin

beg long ol beg insait long ol rum taim ol i kisim stret.

Ol i givim tu wanpela 400 lita frisa na wanpela longpela kabinet insait long ol dispela samting ol i givim.

Long wankain taim, Pasta

Steve wantaim ol woklain long Ruth Haus i amamas long ol dispela samting na tok em i makim nid bilong ol stret.

"Mipela i nidim ol dispela samting stret, ol i givim bikpela helpim stret. Bikpela tenkyu i go long tim bilong Australia long givim gutpela sapatim long wok mipela i mekim. Mipela bai amamas yet long sapatim bilong ol na intres long laip na wok bilong mipela," Pastor Steve i tok.

Mista Page i tok, "Mipela i save olsem ol dispela presen i helpim husat ol lain long gat naispela ples bilong slip i givim mipela bikpela amamas. Mipela bai tingim ol gutpela pren long PNG na naispela 2015 Pasifik Gems."

Famili Laip Toktok Wantaim Sister Lorena Jenal

FAMILI plening insait long Katolik Sios we Katolik Famili Laip opis i laik glasim ol femili

LONG dispela wik, yumi gat nupela kolom i toktok long family Laip wantaim Sister Lorena Jenal bilong Katolik Famili Laip opis long Goroka, Isten Hailans.

Dispela kolom bai givim ol Wantok rida sans long ol tokskul na rot yumi ken bihainim long kamapim ol gutpela famili bikos tude, i gat planti salens i stap.

Hia em namba wan hap.

Kolom bai abrusim wanpela wik bikos long narapela wik, kolom bilong Pasto Barbara Lunge tu i save kamap.

Mipela i laik stat wantaim askim olsem, wanem sios bilong yumi i no save tok yesa long kain kain rot long wet pikinini i save kamap long bel bilong mama yumi save kolim KONTRASEPSEN?

Rot long kontrasepsen i no wanpela samting i bin kamap nau tasol, no gat.

Histori i skulum yumi na toksave long yumi olsem ol manmeri i bin yusim

kain kain we o rot long spesim o avoidim pikinini olsem 4,000 yia samting.

Wanpela we ol i bin yusim em i olsem yusim kain kain plant long pasim bel bilong ol meri.

Dispela kain kain samting i olsem rop, skin bilong enimal o poson i save pasim bel bilong ol meri.

Ol Romans i bin yusim kain kain we bilong ol yet.

Tasol ol lain Kristen i bihainim Kraus pataim tru ol i no bihainim dispela ol rot bilong haiden manmeri i no gat bilip.

Ol i save bihainim tok i stap long Buk Stat 38:8-10, ol Kristen lain i bin bihainim dispela inap long yia 1930.

Long dispela taim, Angliken Sios i tok yesa long Kontrasesen long wan wan taim i gat spesel nid i save kamap.

Dispela wan wan taim i save kamap olgeta taim, sotpela taim bihain. Planti ol arapela sios i bihainim dispela pasin tu.

Tasol Katolik Sios i bin bihainim pasin na tok skul long ol as lain Kristen komuniti.

Tasol kwesten em, olsem wanem yumi mas putim long ples kliia?

Olsem wanem Sios bilong yumi i no bihainim ol nid bilong ol manmeri bilong nau, long tude, long dispela taim bilong planti senis, o taim yumi kolim modern taim?

Na yumi sios tu i gat wanpela gutpela we long spesim o avoidim pikinini.

Planti papamama long olgeta hap bilong graun, i bin yusim na i save yusim yet.

Stadi i soim long ol papamama i save yusim dispela we sios i sapatim i gat liklik lain i brukim marit.

Mi no tok long kantri bilong yumi tasol, no gat, mi tok long olgeta hap graun.



Noken kotim hariap

WANPELA yangpela bisnis meri i go long taun long wokim bisnis bilong em. Em i bin baim wanpela bikpela na naispela haus tru na stap wanpis insait long en.

Klostu long haus bilong em, I gat wanpela rabis lapun meri wantaim tupela naispela liklik pikinini meri bilong em. Ol i stap insait long wanpela haus no gut tru. I no luk olsem haus. Em i luk olsem wanpela ten tasol I pulap long rabis na kain kain samting no gut. Maski haus bilong ol i stap olsem, tasol ol i amamas tru.

Wanpela nait, taim em i kam bek long wok bisnis na kukim kaikai bilong em pinis, na em i redi i go long waswas, wantu tasol pawa idai. **Blek aut.** Ples i tudak olgeta.

Yangpela bisnis meri i yusim lait bilong Mobail pon bilong em na wokabaut i go long haus kuk long kisim wanpela kendel. Taim em i stap insait long haus kuk, em i harim wanpela i nok long dua long fron. Wankain taim em i harim nek bilong liklik meri bilong rabis meri, neiba bilong em; **“Anti...anti...yu stap a?”**

Wantaim liklik kros i stap insait long bel bilong em, em i wokabaut i go long dua. **“Huu-uuu..... wanem samting dispela rabis meri laik askim? Mama bilong em i salim em i kam long askim long kendel a? UUUUhhhhhh.....mi les ya! Mi bai i no inap long helpim ol”.**

Yangpela bisnis meri i komplén.

Taim em i opim dua.....em i lukim stret dispela liklik meri bilong lapun rabis mama neks dua bilong em. Liklik meri i smail naispela tru na askim yangpela bisnis meri: **“Anti...yu gat kendel a?”**

Bisnis meri i tingting wantaim belhat insait long bel bilong em: **“Em nau. Mi tok tru ya. Mama bilong em i salim em i kam long askim long kendel long mi”.**

Tasol bipo yangpela bisnis meri i bekim askim, liklik meri i I tok gen: **“Mi gat tupela kendel hia. Mipela i wari tru long yu, anti. No gut yu no gat kendel. Ples i tudak. Olsem na mama i salim mi kisim tupela kendel bilong yu bai yu ken yusim inap long pawa i kam bek gen”.**

Wantu tasol, pes bilong bisnis meri i senis tru. Belhat insait long bel bilong em i lus olgeta. Ai wara i pundaun long pes bilong em. Hariap tasol em i holimpas strong dispela liklik meri na kisim planti taim.

Bihain, em i holimpas strong moa yet na bisnis meri i opim maus na tok: **“Tenkyu tru.....yu naispela tru.....yu gutpela tru. Tenkyu long ofaim tupela kendel long mi. Tasol, mi gat wanpela kendel i stap. Taim yu nok long dua, mi bin wokabaut i go long haus kuk na kisim kendel bilong mi na laitim”.**

Bisnis meri holim pasim liklik meri yet...na planti ai wara bilong em i kapsait nating nating... ran daun long pes bilong em.

Noken hariap long kotim na kamapim tingting no gut long ol rabis manmeri nabaut.

Yu ken lukim klia tru wanem samting i stap ausait long bodii bilong ol, tasol em i no mak olsem bel bilong ol tu bai stap rabis olsem bodi bilong ol.

CBC i tok amamas long K25 milien helpim

GAVMAN i luksave long kantri i lukim dispela san i draim olgeta kaikai na ol wara na planti provins i kisim bikpela bagarap pinis.

Long dispela gavman i givim K5 milien long ol hap long Hailans husat i kisim bikpela bagarap na bihain taim Praim Minista Peter O’Neil i go na

lukim em i givim narapela K25 milien gen.

Jenerel Seketeri bilong Katolik Sios, Pater Victor Roche i makim maus bilong Katolik Bisop Konprens (CBC) na em i amamas long lukim olsem Praim Minista O’Neil i givim K25 milien long ol pipel i kisim bagarap long ais pundaun na

strongpela san i draim olgeta samting.

Pater Roche i tok tenkyu long Praim Minista na Nesenel Eksekutiv Kaunsel (NEC) long mekim dispela disisen hariap na salim mani i go long ol hap i kisim bagarap.

Em i askim gavman long luksave olsem dispela helpim bai go long ol pipel hariap na long

ol ples i kisim bikpela bagarap.

Em i tok ol i no laikim bai ol rilif i kisim longpela taim o go long rong han o wantok sistem bai kamap.

Pater Roche i tok moa olsem gavman i ken yusim ol sios ejensi i stap klostu long ol ples pipel i kisim bagarap long tilim hariap ol kaikai na ol narapela helpim i go long ol.

Buk baibel i kamapim gutpela pren long kalabus

Frieda Sila Kana i raitim

WANPELA liklik meri nem bilong em, Deborah i bin bungim wanpela bikpela meri husat i wokim wanpela trabel na polis i lokim em long sel sampela yia i go pinis long Boroko polis sel.

Long dispela taim, dispela liklik meri i bihainim papa bilong go autim gutnius long ol manmeri i stap insait long polis sel long Boroko. Em i bungim pren bilong em Maggie husat i mekim trabel nupela taim na i stap insait long polis lokap. Taim Maggie i harim gutnius em i tanim bel na tok sori long God long wanem samting em i mekim.

Liklik meri Deborah em i bin lukim dispela yangpela meri na i sori long em. Em i laik painim wanem gutpela samting bai em i givim em tasol em i no gat samting. Tasol em i holim wanpela Gutnius Baibel bilong em yet long dispela taim bikos em i go long polis sel bihain tasol long lotu na em i holim yet dispela baibel bilong em.

Em i tokim Maggie, “Anti mi no gat wanpela samting long givim yu tasol dispela baibel tasol mi gat na mi laik givim long yu.”

Bihain long dispela taim, kot i givim taim long Maggie na em i go long kalabus long Bomanana. Em i holim dispela baibel olsem laip bilong em na



Sindaun, L-R Maggie, Deborah, Mama bilong Deborah, - Sanap L-R Papa bilong Deborah, pren bilong Deborah, Wynita Roa. Foto: CS Midia

i go long kalabus.

Long dispela yia, sampela mun i go pinis, papa na mama bilong Deborah i go long wokim lotu wantaim ol meri long haus kalabus na taim Maggie, husat nau i stap 6-pela yia long kalabus pinis, i lukim papa bilong Deborah na em i luksave long em. Bihain long lotu em i askim mama bilong Deborah sapos em i mama bilong Deborah.

Taim mama i tok yes, sori dispela meri Maggie em i kra na i opim baibel ya na i soim nem bilong Deborah we em yet i raitim, long mama bilong

em.

“Lukim dispela em i baibel bilong Deborah. Em yet i raitim nem bilong em na em bin givim mi na nem bilong em i stap yet mi no save rausim. Mi save kisim planti gutpela baibel tasol dispela em i lewa bilong mi stret.

Maski em i bruk long sait, mi kisim stiki tep na pasim long holim pas. Plis tokim Deborah olsem baibel bilong em i sevim laip bilong mi na mi no save lusim tingting long pre long em,” Maggie i tok.

Long dispela taim i kam bilong de bilong Ripentens na

Kavanen, papa na mama bilong Deborah i wok long painim we long kisim em i go long bungim pren bilong em long haus kalabus. Ol i painim gutpela sans long go nau long dispela de Ogas 26, 2015 long bihainim wanpela singaut i kam long Koreksenel Sevis Hetkwata long ol niulain i go long mekim luksave bilong dispela de wantaim ol long namba wan taim.

Nau Deborah i go long haus kalabus na bihain long prea taim em

ol woda i mekim rot long em i bungim pren bilong em Maggie. Deborah i paul liklik, long wanem em i bin liklik meri tru na ino inap long tingim wanem samting i bin kamap long bipo.

Tasol Maggie i bin amamas tru na holim pas long em na i lusim aiwara long em i bungim Deborah bihain long siksipela yia.

Maggie nau em i lotu strong na i senisim laip na em i bilip long God bai opim dua long em wanpela de na em bai go ausait gen long mekim wok bilong God ausait.



PROPOSEL RIPOT RAITING WOKSOP: Grup i bin sindaun long wanpela ripot raiting woksop long Emaus Konprens senta, Pot Mosbi. Planti taim, ol wok manmeri bilong Katolik Sios i save lukim ol nid bilong ol daiosis na peris we i karamapim edukesen, helt na sosel sait na ol i save raitim ol proposel o ripot i gat ol askim long helpim mani na ol narapela samting long helpim ol wan wan eria. Raiting proposel ripot i no isipela samting na sios i bin holim woksop long givim skul na save long ol woklain bilong em i kam long ol wan wan daiosis long kantri long rot stret bilong raitim ol proposel. **Foto: Veronica Hatutasi**



KOMENTRI

Gavman i mas luksave long askim bilong ol speselis dokta long kantri

Bikpela bung bilong ol dokta long kantri i kamap long Mosbi long dispela wik. Dispela bung ol i kolim PNG Medikal Simposium i save bringim ol dokta i kam bung na toktok long ol sik na arapela samting long eria bilong helt long kantri.

Ol dokta husat i speselis long ol sik i save kamap na toktok long wanem samting ol i painim aut, na harim tingting bilong ol arapela wanwok na bihain ol i givim tingting bilong ol long ol rot bilong stre-tim ol dispela hevi long kantri. Na dispela yia em i namba 51 yia bilong dispela bikpela bung bilong ol.

I gat planti speselis dokta i kamap na toktok long ol hevi ol sik i save kamapim na ol i toktok tu long ol bikpela salens helt sevis bilong kantri i save bungim long helpim ol sikman na meri. I gat tu ol ovasis speselis dokta i bin kam long dispela bung na ol i toktok long wok bilong ol tu long ol sik em yumi hia long PNG i wok long bungim.

Ol kain sik olsem kensa na moa yet long kensa bilong bilum bilong ol mama. Dispela sik i save kilim panti meri long PNG long wan wan yia.

I gat bikpela askim i stap long ol rot bilong helpim ol sikmanmeri na ol bel mama long taim bilong karim. Wanpela bikpela askim em long namba bilong ol nes insait long kantri. PNG i sot tru long ol biklain nes na ol speselis nes. Long olgeta haus sik na helt senta dispela hevi bilong ol nes em i wanpela bikpela wari tru. Planti

mama i save dai long taim bilong karim bebi bikos i no gat nes i sambai long helpim ol. Ol nes bilong helpim ol bel mama i karim gut bebi i mas gat spesel trening long dispela wok.

Long PNG tude, samting olsem 1400 mama i save dai long taim ol I karim bebi. Namba bilong ol mid-waif o nes bilong ol bel mama i stap daunbilo tru, tasol i gat wok i kamap long givim trening long ol dispela kain nes.

Sapos ol wan wan skul bilong ol nes i ken kamapim 20 midwaif greduet long wanpela yia, bai kantri i lukim 100 midwaif nes long wan yia. I gat 5-pela skul bilong nes long kantri tude. Tasol dispela namba i daunbilo yet, bikos populesen bilong kantri i abrusim pinis mak bilong 6 milien na i wok long surik i go antap hariap tru.

Las wik, Minista bilong Nesenel Plening i bin toktok long Waigani Semina we em i tok wan wan provins i mas gat skul bilong nes na skul bilong ol tisa bikos populesen i bikpela tru na ol nes na tisa i sot tru.

Helt dipatmen i luksave long hevi bilong ol nes, olsem na em i gat program bilong givim skul long ol mama long ples long pasin bilong helpim ol mama long taim bilong karim. I gat ol gutpela stori long ol man na meri nes bilong ples husat i mekim dispela wok bilong helpim ol mama. Ol i no kisim bikpela pe long dispela kain wok. Ol i luksave olsem i gat nid bilong helpim ol mama olsem na ol i volantia long mekim wok.

Narapela bikpela salens bilong



lukautim gut ol sikman em hevi bilong mani. Ol dokta husat i bin tok long dispela bung i autim gen wari bilong ol long ol masin i bagarap o marasin i sot o ol wokman i sot bikos i no gat mani na sapot bilong gavman. Ol i tok nesenel gavman i no harim askim bilong ol. Wanpela gutpela eksampel em re-dioterapi sevis bilong ol kensa sikman long Angau haus sik long Lae. Kobalt masin bilong givim re-dioterapi tritmen i bagarap na i mas gat nupela long kisim ples bilong en. I tru nesenel gavman i promis long wokim wanpela nupela yunit bilong kensa tasol wok

bai i no inap pinis inap foapela yia moa. Tasol foapela yia em i longpela taim tumas long ol sikman i wet. Planti moa bai dai bipo long dispela nupela kensa wod i redi.

Sapos yumi laik kamapim kwaliti helt sevis long kantri, orait i mas gat gutpela plen i kamap long wan wan distrik, provins na long 4-pela rijon bilong kantri.

Insait long wan wan yia, gavman i save givim bikpela mani tru i go long helt na edukesen. Tasol bikpela mak tumas i save go long edministresen na i no gat inap mani i go long sanapim gutpela haus sik, ol kwaliti speselis helt

woka na ol program bilong stopim ol bikpela sik i save kilim ol mama na pikinini long kantri.

Yumi hop ol toktok bilong ol speselis dokta bai pundaun long yau bilong ol gavman dipatmen husat i go pas long plen bilong kamapim ol wok.

Ol i ken harim na givim gutpela stia i go long ol lida long gavman. Olgeta yia planti pipel bilong yumi i save hatwok long painim mani na go long ol ovasis haus sik long kisim marasin.

Watpo bai PNG i no inap givim dispela kain sevis long ol pipel bilong yumi hia long asples yet?

Kamapim PNG Spots Ekspo i gutpela

PAPUA Niugini Spots Faundesdesen i no long taim i go pinis i bin lonsim wanpela bikpela program bilong em.

Dispela progrem em PNG Spots Ekspo. Dispela i min olgeta Nesenel Spot Federesen long kantri bai bung na soim ol yet na ol pilai ol i save ranim long ol pablik.

Em i taim pablik i save na tokaut long laik bilong ol long spot ol i laikim long em.

Dispela Ekspo bai kamap long Pot Mosbi long 26-28 long Novemba long dispela yia.

Em i namba taim long kain ekspo i kamap na long taim bilong lonsim Sif Eksekutiv Opisa (CEO) bilong PNG Spots Faundesdesen Peter Tsiamalili Junia i tok bihain long gutpela kamap bilong Pasifik Gems em i gutpela tu long kain samting i kamap.

Dispela long wanem Pasifik Gems i opim ai bilong planti manmeri long gutpela samting pilai i ken bringim.

Long ol i pas wantaim spot, kamap spot manmeri



na lukim kain gutpela senis i kamap long laip bilong ol.

Na kamap bilong Spots Ekspo i bilong givim sans long ol manmeri long ol kam save long wanwan ol spot na sapos ol i laik bai ol i tokaut long tingting bilong joinim wanwan ol spot federesen.

Spots i helpim manmeri long planti gutpela samting. Em i save senisim tingting bilong manmeri long kamap gutpela manmeri, long stap helti, long bungim na mekim pren wantaim ol arapela manmeri, long go lukim planti ol arapela ples na long mekim mani tu.

Papua Niugini Gavman bihain long em i tok long

givim prais mani long ol spot manmeri husat i winim medal bai kisim mani.

Long dispela wik Gavman i givim K6 milien long PNG Olimpik Komiti long em i givim K20,000 long husat i winim gol medal, K10,000 long husat i winim silva medal na K5,000 long husat i winim brons medal. Na i gat hap mani i stap yet na gavman i tok em bai givim long olgeta husat i bin pilai long Pasifik Gems.

So mipela i ken tok dispela i gutpela disisen gavman i mekim. Plant spotmanmeri i no wok na wantaim kain sapot dispela bai helpim ol long stap strong long komyuniti na kamap gutpela sitisen bilong kantri.

Em olsem na kamap bilong Spots Ekspo i bilong givim sans long ol manmeri i bung wantaim ol nesenel spot federesen na soim laik bilong ol.

Long taim bilong lonsing bilong Ekspo, Minista bilong Spots na Nesenel Iven

Justin Tkatchenko gavman i gat bikpela sapot long spot na bai skruim yet dispela tingting.

Em i tok long 2016 Mani Plen gavman bai givim inap mani long skruim yet sapot bilong em long Hai Pe-fomens Yunit or Trening program na Go Fo Gol program.

Inap olsem K40 milien mani gavman i bin givim long PNG Olimpik Komiti long ronim ol progrem bilong em long tupela yia na Pasifik Gems i lukim kaikai bilong dispela sapot.

Dispela kain ol program i bin helpim Papua Niugini we ol i winim 88 gol medal na kamap namba wan long Pasifik Gems.

So program i gutpela na i karim kaikai na olsem gavman bai givim gutpela sapot.

Wantaim kain sapot manmeri husat i gat laik long kamap spot manmeri i ken tokaut long laik bilong ol yet long taim bilong Spots Ekspo.



Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Gavana Jenerel na Ledi Ogio bihain ol i go raun lukim Great Wall of China na ol i wokabout i kam bek wantaim ol bik manmeri bilong embasi long Saina na ol lain long opis bilong Saina Praim Minista.

Government House Photo

Saina i bikpela tred patna bilong PNG

...Tupela i strongim wok patna na wok pren

Veronica Hatutasi i raitim

Kantri Saina na PNG i no nupela long wanpela narapela, no gat.

Tupela i statim wok pren namel long ol bipo yet.

Ol Saina i bin kamap long PNG bipo long Wol Wo 2 na planti i bin sindaun long Nu Ailan na Is Nu Briten provins na statim ol stua bisnis bilong ol we planti long yumi i save kolim ol ples we i gat ol Saina bisnis na stua long ol long 'Saina Taun.'

Ol Saina i bin kam sindaun long PNG i helpim ikonmik divelopmen bilong PNG wantaim ol tred stua bisnis. Planti i marit tu long PNG na ol i gat ol 5 na 4-pela jenereesen nau long PNG.

Nau Saina i kamap namba wan bikpela tred patna bilong PNG, winim Australia na ol arapela kantri.

Dispela toktok i kamap long ples klia long dispela wik taim Gavana Jenerel na Gren Sif, Sir Michael Ogio, i bung wantaim Presiden bilog Saina, Presiden Xi Jinping long Beijing, Kapitel biloing Saina.

Presden Jinping i bin askim Sir Michael long go long Saina long stap insait long namba 70 anivesari selebresen bilong makim Wol Anti Fasis Wo i kamap long

tude, Septemba 3.

Taim Presiden Jinping i amamas na tok welkam long Sir Michael long tok yes long askim bilong em na go selebretim 70 anivesari wantaim ol, Presiden Jinping i tok tupela kantri i bin wokim bikpela kontribusen long wo.

Em i tok ol pipel na gavman bilog tupela kantri i gat ol matmat long ol lain i bin dai long Wol Wo 2, na long PNG, i gat matmat bilong ol Saina i bin dai long Wol Wo 2 long Rabaul, is Nu Briten provins.

Presiden Jinping i bin autim tok amamas long namba 40 PNG indipendens anivesari PNG bai selebretim long Septemba 16.

"Mi givim bikpela amamas i go long PNG long kisim indipendens bilong em," Presiden Jinping i tok.

Insait long ol bung bilong tupela, ol i strongim tu komitmen bilong tupela kantri long wok bung wantaim na strongim wok pren na tred namel long ol..

Presiden Jinping i tok nau Saina i kamap olsem bikpela tred o bisnis patna bilong PNG, na Saina i lukluk nau wokim moa invesmen long PNG long level i go antap moa.

"Invesmen bilong Saina long PNG LNG Projek i

bikpela, em i gat invesmen long komyunikesen brotben program long PNG na tu, long Ramu Nikel.PNG i gat planti naturel risos na Saina i gat indastriel risos. i gat bikpela mak long tupela kantri i strongim na groim ol wok bisnis na pren pasin namel long ol," Presiden Jinping i tok.

Presiden i tok Saina i katim 100 milien (samting olsem K44 milien) i go long Pasifik rijon nae m i askim PNG long painim helpim long dispela progrem.

Em i tok Saina i sanap redi long helpim PNG long divelopim ol infrastraksa bilong em, na moa yet, long eria bilong egrikalsa, helt na edukesen.

Em i tok Saina i luksave long bikpela wok PNG i gat long Pasifik rijon na i tok moa olsem Saina bai sapotim PNG long lukautim APEC bung long 2018.

Long bekim, Gavana Jenerel Sir Michael i tok em i luksave long bikpela na gutpela helpim Saina i givim long PNG gavman we i helpim PNG long divelopim ol infrastraksa na opim kantri i go aut long wol.

Sir Michael i bin askim tu presiden bilong Saina long kam long 2018 APOEC bung bai kamap long Mosbi.




Sir Michael i putim mak bilong em long visitas buk.

Ol Poto: Gavman Haus



Gavana Jenerel Sir Michael Ogio wantaim PNG Ambaseda long Saina, Christopher Mero na Ambaseda bilong Saina long PNG, Ambaseda Li Ruiyou bihain long gutpela bung wantaim Saina Presiden, Xi Jinping long Great Hall of the People long Beijing.



Ambaseda Mero na ol woklain bilong em, Fes Seketeri Brian Kaumu na namba tu Seketeri, Philip Taunakekei na ol meri bilong ol.

Ol Katolik Profesenel i laikim tok sori

KATOLIK Profesenel Sosaiti (CPS)I egensim tru pasin sampela lain long Lae, Morobe provins i bin paitim Katolik Bisop bilong Lae Daiosis, Christian Blouin.

Insait long wanpela stetmen, Presiden bilong CPS, Paul Harricknen, i tok sampela lain insait Lae taun i bin paitim Bisop Christian taim em i laik stopim sampela lain i autim Tok long strit long las wik na mekim ol tok i no gutpela long Katolik Sios.

Mista Harricknen i tok ol dispela strit prisa i bin karim ol piksa bilong Pop na ol Kadinel na ol i wok long

mekim ol tok no gut long Katolik Sios.

Wanpela long ol samting ol i wok long tok long en em taim ol Katolik Sister i karim ol bebi, ol i save katim nek bilong ol (bebi) na dringim blut bilong ol.

Em i tok taim dispela toktok i wok long kamap, wanpela Sister i wok-about i go na ol stri lain i singaut long em na em i no amamas long dispela na em i putim ripot long ol polis.

Em i bin ringim tu Bisop Christian na tokim em long dispela samting.

Olsem na Bisop Christian i go na tokim ol strit prisa long stop long

mekim ol dispela kain toktok.

Long dispela taim nau, pablik i kisim ol ston na tromoim i go long en, na paitim het bilong em.

"Dispela samting i no gutpela na i no gat nit long kamapim birua long bisop.

"Dispela em i kliapela samting long pipel i yusim krangi fridom long toktok na bagarapim fridom bilong rilijen long ol narapela. Pasin ol strit prisa i mekim em i wanpela kriminel pasin we i bagarapim pis o wanbel pasin, kamapim bagarap long narapela na wokim giaman toktok.

"Sapos ol polis i gat ripot long

dispela, mipela i laik save ol polis long Lae i mekim wanem samting long ol strit prisa ya.

"Taim i gat ol strit prisa i save serim gut Tok bilong Bikpela, sampela i painim toktok na i save laik tok baksait na bagarapim ol narapela sios.

"Ol dispela toktok egensim Katolik Sios i giaman tru. i moabeta long stopim ol kain strit prisa long ol pablik ples na strit. Ol lida bilong ol dispela lain na sios i mas kisim sut tok long dispela," Mista Harricknen i tok.

Em i tok Katolik Sios i save rispektim na luksave long ol narapela sios olsem i stap aninit long

Seksen 4 bilong Mama Lo bilong dispela kantri.

Em i tok ol narapela sios i mas rispektim tu Katolik Sios.

Em i tok Katolik Sios i mekim bikpela kontribusen long ol wok developmen bilong PNG long sait bilong sosel, iekonomik na spirituel developmen bilong ol pipel, na i no dispela samting ol i wokim long sios na wokman bilong em.

Olsem na sosaiti i askim ol lain i wokim dispela samting long wokim pablik tok sori i go long Bisop Christian na tu, singaut long gavman long stopim strit prising egens ol narapela sios.

Arawa i makim De bilong Tingim ol manmeri i lus yet



Eleanor Maineke i raitim

OGAS 28 i bin lukim Long Arawa long Atonomas Bogenvil Rijon (ARB), i tingim ol Missing Person long taim bilong hevi na pait long ailan, o ol manmeri na pikinini i lus na ol i no painim ol yet.

Dispela de i bin wanpela de we netsa i bin kra i sori wantaim ol lain husat i bin mas raunim Arawataun.

Insait long Bogenvil pait, planti ol papa, brata na susa i bin lus na ol lain famili blong ol i painim ol yet.

Memba i makim ol meri long Sentrel Bogenvil, Honorebol Marceline Kokiai i bin stap long dispela de tu wantaim ol mama.

Em i bin tok' Yumi ol mama i mas kamap ol nek bilong ol gEDA mama insait long Bogenvil bai gavman bilong yumi ABG i ken harim yumi."

Tu, memba i makim ol ek-

spaitman long Sentrel Bogenvil ,Noah Doko, i bin stap.

Emtu i tok yumi mas wok bung wantaim long painim ol lain bilong yumi i stap olsemol missing pesons o ol man i lus i stap yet.

Man i makim Bogenvil Pis Bilding Program, Steven Sonnei i bin singaut long olgeta manmeri bai ol i wok bung wantaim na planim gut ol bikman meribilong yumi husat i stap olsem ol missing persons na slip long ol hap nabaut.

Wantaim helpim bilong Red Cross International (ICRC) i gat nau Polisi Bilong Missing Persons i stap. Tasol wok i kamap nau tasol.

Dispela de i bin pinis wantaim ol manmeri i lukim ol piksa bilong ol sampela missing persons we ol lain famili i gat piksa bilong ol na ol i putim aut long ol manmeri i ken lukim.



Ol Poto: Eleanor Maineke

Stori bilong tumbuna

Sikau i Lusim Han



Longm wanpela ples i klostu long nambis sikau na dok i stap.

Wanpela taim sikau i kirap i go long bus na painim ol pikinini bilong kapiak. Em i kisim i go long haus na em i kukim na i kaikai i stap.

Nau dok i kamap na em i askim sikau, poroman yu kaikai wanem samting tru? Sikau i tok mi kaikai pikinini bilong kapiak. Dok i askim Sikau, inap long mi traim wanpela? Sikau i kirap na i givim em wanpela. Man dok i kaikai na em i swit tru.

Dok i askim sikau em i kisim we, na sikau i tok em i kisim long bus. Bihain dok i go long bus na painim pikinini kapiak i kam na i kukim i stap. Dok i askim sikau bai em i rausim skin olsem wanem na kaikai?

Sikau i tok mi rapim long bros bilong mi na mi rausim skin. Dok i kirap rapim long bros bilong em na skin bilong dok i kamaut olgeta. Sikau i no sori tru long poroman bilong em, em i tok sapos em i pen yu mas rapim strong moa no ken pret. Dok i rapim ken na skin i kamaut olgeta.

Tarangu dok i pilim pen tru na em i tingting bai em i bekim olsem wanem?

Wanpela de dok i tokim sikau poroman yu kam na mitupela i go painim pis long solwara. Nau em i gutpela taim tru long painim pis. Tupela i go kamap long nambis na kisim kanu na pul i go aut long solwara.

Tupela i pul i go nan dok mi lukim wanpela kramsel na em i kisim na kaikai. Sikau i lukim na i tok, yu kaikai wanem? Dok i tokim em, mi kaikai kramsel. Sikau i tokim dok, sapos yu lukim wanpela gen bai mi go daun ksime.

Dok i lukim wanpela kramsel na em i tokim sikau i go daun na kisim. Sikau i tok bai mi kisim olsem wanem? Dok i tokim em taim yu lukim im kramsel i op i stap, yu supim han bilong yu i go insait na pulim em i kam ausait.

Sikau i go daun long solwara na supim tupela han bilong em i go insait long maus bilong kramsel. Nau kramsel i pasim maus bilong em na katim tupela han bilong em. Dok i giamanim sikau na sikau i lusim 2-pela han bilong em pinis. Nau sikau i gat tupela sot-pela han tasol.

**Walter Tobung Tabu,
Hoskins**

TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500. Tenkyu

Raun wantaim Wantok kru ...

PUTIM WAS: Ol polis manmeri i save mekim bikpela wok long lukautim yumi na lukautim ples, provins na kantri tu wantaim. Maski planti toktok i save raun olsem ol i no save mekim gut wok bilong ol, tasol bikpela samting em yumi save sef long wan wan nait na de bikos ol polis i stap. Long wiken sapos i gat bikpela pilai olsem ragbi fainal o soka fainal bai ol polis raun na sekim ples bilong pilai sapos i gat ol spak man o bikhet manmeri. Dispela ol spesol yunit bilong Megriga i bin raun long Sande long bikpela pilai ragbi namel long Hunters na Bears long Sir John Guise Stadium.

Poto Nicky Bernard.



KAIKAI I STAP: Provinsel De i save pulim planti manmeri na pikinini bilong ol provins ol kam long en. Long Pot Mosbi, planti ol provins i amamasim de bilong pinis na sampela i no yet na dispela wiken tu bai sampela i kamap de bilong provins bilong ol. Planti ol liklik bisnis manmeri save mekim liklik mani bilong ol long provinsel de. Ol save salim kaikai, ol klos, basket na planti ol liklik samting bilong tumbuna bilong provins bilong ol. Dispela tupela piksa i soim ol yangpela Manus pikinini i amamas long baim hotpela sosis long wantok bilong ol yet long Manus De na ol mama tu i soim wanem kaikai ol ken kukim long ston na ol basket ol i mekim long han. **Poto Nicky Bernard.**



Em nau! Ol pikinini i ken painim rot i go long ples wantaim Wantok kru...



Sik Kanage

Lapun Kanage i kus i go tulait na go long haus sik long kisim sampela kus marasin.

Em i go kamap long haus sik na wanpela nes meri i askim em long wanem kain sik i kisim em.

Na Kanage i kus wantaim na tokim nes meri: "O pikinini, strongpela kus i bagarapim mi stret. Mi no slip long nait. Mi kus i go i go na skin bilong mi i bagarap." Nes meri i kirap na tokim Kanage.

"Sori tru papa. Gavman i sot long mani na mipela tu i sot long kus marasin." Kanage i harim olsem na tokim nes. "Na bai olsem wanem nau. Mi i kam long kisim marasin. Mi no kam long yu tokim mi olsem gavman sot long mani na no gat kus marasin."

Nes meri ya i tingting i go na tokim Kanage.

"Maski yu go long haus na painim sampela tum-buna marasin na dring."

Kanage i belhat na tokim nes meri ya olsem.

"Sapos mi go long haus na kus i mekim save long mi, bai mi kam bek long hausik na kisim yu go long haus na bai yu soim mi olsem wei bilong wokim marasin bilong ol wait man."

Marasin boi Wewak

Ai yu Tisisel fukatif

KANAGE i laik winim mani long Digicel fukatif resis i bin save kamap long sampela yia i go pinis we ol anaunsa bilong Nau FM i bin save givim klu long ol man long painim dispela fukatif long Mosbi siti.

Em i harim mani i go antap long 8,00 na em tingting long painim fukatif long neks moning.

Kam neks de, Kanage i kirap long moning yet, na stap pinis long 4 Mail wantaim liklik redio long yau iblong em.

Em nau, nius pinis na anaunsa long Nau FM i givim toksave na long sem taim, em i givim liklik klu na tok olsem 'Look different in the mirror'.

Kanage harim i go na tingting i wok nau.

Em i tingting i go, i go na em tingim em bai long baba shop o long hea salun (hair Saloon). Em i resis long bas stop bilong 4 Mail i go long Ori Lavi Haus olsem ol tewel i ronim em.

Kamap stret, ful stop na lukim geit i no op yet. Em i tingim Trends hea salun long hapsait i go olsem long strit sin (street scene). Raket i go kamap long hap na i laik pusim dua long go insait, tasol em i lukim wanpela man i sanap long kona bilong ae salun.

Em i go klostu na kirap askim, 'Ai yu Tisisel fukatif?'



Man ya, i kirap no gut na paul wantaim bekim. 'Husat! Mi, ah?'

Kanage, i no westim taim. Em i askim em gen 'hariap, yu tok, Ai yu Tisisel fukatif?..yes o no?'


Man ya i bekim... 'hey, husat tif bilong yu, mi nau tasol mi kam long ples ya. Yu longlong o, yu lukim mi olsem raskol man ha?'

Side Kona Joe

Ansa bilong Wod Pilai isu 2137



EM ORAIT




EM NOGUT

Ol wod lista hia:

- ANKA
- ARERE
- BAMAN
- BIPOTAIM
- BRUKIM
- DANIS
- DUKDUK
- GIRAM
- GORGOR
- GUDE
- HAPTUMORA
- HIDEN
- INGLIS
- KARAMAP
- KIVUNG
- KALANGAL
- LIPTIMUPIM
- LOMAN
- LONGWE
- MIPELA
- MUMUT
- NAINTIFAIV
- NOVEMBA
- OLGETA
- PIKSA

H N N T R A R C R M O V I R U Z E E X S
P I F O N D E M E G A I C L F R F N K F
R G V B E S E T X E Z T O I P G W L I O
C G M R E C U E F N M A R E R E A I V M
E A R L M N J A M D U C E S I G D I U O
K T N Z T T E F D G M E J H N C A K N O
O N E I P E J N N U U A V A O F U N G F
H G C S I I F A R D T O L P I D D M I A
A T R O T O M E S E A A L T K K I C R E
A N I E T A A I G P K L N U F A H Q A E
S F K O B G L L S X E I D M T R M N M S
N W R A F G O I N Q A P S O M A A M F E
M I H P N E N R E N I T P R K M G N A X
U S S I L A G S G Q N I A A O A S A S P
F E E K D C W S T O B M H L R P C S E C
Z T D S K E E P D B R U K I M I O E U A
O S E A H B N V L M I P E L A S K A V H
I C G Z E S Q T K X T I N H C Y G O E S
S R E U H N E N O V E M B A E N E E G U
S F Q D D Y G D A C N C E N Q Z H P S L





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

PNG wari long moa hevi ken kamap long nogat ren longpela

OL atoriti long Papua New Guinea i wari long planti moa kain kain hevi na sik i ken kamap bihainim ples i drai long wanem, i nogat ren i pun-daun long longpela taim.

Siaman na Ekting Seketeri bilong Nesenel Disasta na Ekting Seketeri bilong Dipatment ov Provinseal na Lokol Gavman Afeas, Dickson Guina i mekim dispela toktok.

Em i tok olsem taim ol i wok long lukluk long apim tok lukaut level long sampela ples long Hailans rijon we bikpela sot long wara na bikpela kol i wok long kamapim bikpela hevi nau.

Mista Guina i tok 40 tim em ol i bin salim ol long mekim wok painimaut long 4-pela rijon bilong kantri i go bek pinis wantaim ol ripot bilong ol na klostu bai ol i tokaut long sampela tingting em gavman na ol provinsel gavman i mekim long ol helpim ol pipel.

Em i tok tu olsem sampela hap tasol long ol wanwan provins i kisim bikpela bagarap.

Long wankain taim, PNG praim ministra i tok-tok long helpim em gavman i givim long ol pipel.

Papua New Guinea gavman i tok em i givim gen narapela K25 milan kina long helpim ol pipel husat i wok long bungim hevi long bikpela sot long wara na tu, bikpela kol long ol provins bilong hailans rijon.

Praim Minista, Peter O'Neill, i tokaut long dispela mani bihain long em i bin go raun na lukim ol ples long hailans olsem Tambul na Mendi long stat bilong las wik.

Bruce Hill bilong Pacific Beat, i bin toktok wantaim Praim Minista O'Neill long Brisbane we em i bin stap long PNG Advantage Investment miting.

Mista O'Neill i tok dispela wokabaut bilong em i go long hailans em i bilong lukim ol wok long skelim kaikai we gavman i bin givim mani long en pastaim.

Em i tok tu olsem em i givim tok lukaut i go long ol pipel olsem ol i mas redi na was gut nau long wanem, dispela taim i bilong nogat ren na bikpela kol bai go het yet long sampela moa mun i kam.

Praim minista i tok gavman bilong en i bin givim K5 milian long wik i go pinis na ol i baim pinis ol kaikai bilong helpim sampela famili.

Bruce Hill i bin askim tu Praim Minis O'Neill sapos dispela mani em gavman i givim long baim kaikai bilong ol pipal inap o nogat na emi bin bekim olsem.

Praim Minista O'Neill i tok tu olsem gavman bilong en i bin givim narapela K25 milian long baim planti moa kaikai na helpim ol pipel.

Em i tok tu olsem, em i save sampela pipel bai tok dispela K30 tausan kina i no nap, tasol em i tok em i wanpela wok oli statimpinis na bai ol i was long dispela hevi.

Dispela tupela taim nogut em, bikpela sot long wara na bikplea kol i hamarim PNG.

Long wankain taim, Minista bilong Egrikalsa, Tommy Tomscoll, i bin tokaut long stopim Australia na Nu Silan long salim ol kaikai na prut i go long PNG, na dispela i mekim planti pipel na sampela bisnis lain olsem ol stua i wari nogut bai ol i sot tru tu long kaikai.

Em i tok tu olsem dispela hevi long kantri nau inap mekim ol i lukluk gut ken long dispela tingting bilong stopim wok bilong baim ol kumu na prut i kam long Australia na Nu Silan.

PNG Palamen Komiti i lukluk long HIV na AIDS long kantri

GAVMAN bilong Papua New Guinea nau iwok long karimaut wok painimaut o enquiry i go long HIV/AIDS long kantri.

Gavana bilong Wes Nu Briten Provins na Siaman bilong dispela komiti, Sasindran Muthuvel i tok-wanpela spesel palamentari Komiti long HIV na AIDS nau i raun long

4-pela rijon bilong kantri long mekim dispela wok bilong lukim wanem kain hevi dispela sik i save kamapim long laip na sidaun bilong ol pipel.

Mista Muthuvel i tok as tingting bilong dispela wok painimaut em bilong save tu long ol kain wok em gavman aninit long Helt Dipatman i mekim long helpim ol pipel i gat sik AIDS.

Papua New Guinea i gat bikpela namba tru long ol pipel i gat AIDS i winim ol narapela kantri long Pasifik rijon.

Gavana Muthuvel i tok ol i wok long raun long Nugini Ailan rijonlong mekim dispela wok.

Pig faming i helpim ol Melanisen pipel ...PNG Pik food sekyuriti

WOK bilong lukautim pik inap helpim ol pipel long PNG na ol narapela Melanisen kantri long fud sekyuriti bilong ol.

Michael Theophilus Oganpewa Dom, PhD enimal saiens sumatin long Yunivesiti bilong Adelaide long Saut Australia em wanpelka save man bilong PNG long sait bilong lukautim ol pik i tok ol pik i ken helpim tu long sait long fud sekyuriti long PNG na tu, long ol arapela Melanisen kantri.

Mista Dom i tok ol pipel long ples i ken wokim fam bilong pik long lukautim famili bilong ol yet, givim pik long kisim ol narapela kain kaikai na salim pik long kisim mani long baim kaikai.

Em i tok maski pik i save kaikai planti tumas na ol i save lusim planti mani tumas long long baim ol kaikai bilong ol, em i gat sampela we long daunim ol mani long lukautim ol pik.

Mista Dom i tok wanpela long ol em long givim kaikai long ol pipia bilong kaikai long gaden long ol pik, na putim pipia o pekpek bilong pik i go bek long gaden.

Em i tok long sait long sik bilong ol pik, bikpela wari nau em long sait long ol wom o snek long bel bilong pik

Mista Dom i tok pik em i bikpela samting tumas long laip bilong ol pipel long Melanisia.

Yumi save go hantim o kilim dai pik long ples blong kaikain samting, yumi nidim pik long taim bilong marit, wokim belisi long komyuniti na tu, long ol kainkain kastom samting long ples.

Mista Dom i tok PNG i gat bikpela diman long sait long pik na maket blongen i bikpela tru.

Em i tok dispela luksave i mekim planti fama long PNG i stat long kamapim ol fam bilong pikpik long kisim mani.

Em i tok bikpela samting long komesal sait long famim pik em long sait long kaikai bilong ol na dispela nau i bikpela hap bilong stadi blongen.

EHP pipel i mas was gut long sik

OL bus toilet olsem displa long Sandaun provins em ol pipal i mas mekim long lukautim helt bilong ol.

Joy Waffi Care Australia's Imejensi Menesa long Goroka, Isten Hailans provins i wok long askim ol pipel long wasim gut han bilong ol na tu, long yusim toilet long dispela taim nogut odrai sisen, nogut bai ol i kisim sik taipoid.

Sik taipoid i isave kamap taim ol pipel i dringim ol deti wara, na tu ol i no save wasim han na ol i no save yusim toilet na pek pek nabaut.

Isten Hailans provins iwankain olsem ol narapela provins long hailans na ol narapela hap bilong kantri i no lukim ren long 4-pela mun nau.

Ol i ting nogat ren bai pudaon long planti mun yet.

Imejensi Menesa bilong Care Australia i wari long ol i sot tru long wara na kaikai.

Solomon ailan i lukluk long len rifom

Praim Minista Manasseh Sogavare itok em i laikim Solomon Ailan i kamapim wanpela rot kantri bai bihainim long sait long graun bilong kantri.

Mista Sogavare i mekim

dispela toktok taim em i opim Len Rifom Konprens long Honiara long dispela wik.

As tingting bilong dispela konprens em long Solomon Ailan i kamapim gutpela rot bilong len rifom o mekim senis long graun bilong kantri.

Genesis Kofana, Nesenel Konsalten bilong Solomon Ailan avman long Len Menesmen i tok konferens bai toktok tu long tupela draf loa long sait long len o graun.

Sampela long ol deleget long konprens i kam tu long Papua New Guinea, Fiji, Vanuatu na Australia.

Mista Kofana i tok as tingting long invaitim ol em long Solomon Ailan i ken kisim sampela tingting long len tenea o sistim bilong ol long graun.

Australia multi-kalserel wik long Far Not Kwinslen

LONG Cairns long Far NotKwinslen, ol pipel nau i wok long makim Malti Kalserel Wik i bin kamap long wanpela wik las wik.

As tingting bilong displa multi kalserel wik i bilong soim na luksave long ol kain kain kalsa na pipel long Australia.

Ol wan wan stet long Australia i save makim dispela wik long taim em ol yet i makim, na dispela wik em i taim bilong Kwinslen long selebretim kalserel wik bilong en.

Far NotKwinslen i gat bikpela namba tru bilong ol pipel bilong Papua New Guinea long wanem em i klostu tru long PNG. Tu, i gat ol narapela komyuniti olsem bilong Vanuatu, Tonga, Fiji, Samoa, Cook Islands na Solomon Ailan tu i stap long Cairns.

Mary Hikimet em i komiti memba na brotkasta long Cairns komyuniti multi kalserel redio stesen FM 89.1i tokim Redio Australia olsem dispela taim, em i taim bilong ol wan wan komyuniti long soim ol pasin tumbuna bilong ol.

PNG Goroka Yunivesiti sumatin i stap yet long haus sik

Tupela sumatin em ol polis i bin sutim het bilong tupela long trabel i gat bikpela hevi na i stap long haus si.

Antonia Mision nius meri blong NBC long Gorokai tok tupela sumatin bilong Yuniversiti bilong Goroka long Isten Hailans provins nau i sik nogut tru long haus sik bihain long ol i bin sutim het bilong tuepla long pait wantaim polis long Goroka taun long dispela wik.

Ol ripot i tok ol dispela sumatin i bin mas long taun long sapatim askim bilong ol long Yuniversity Vais Sansela, Gaio Onagi, imas lusim wok bilong en.

Provinsel Polis Komanda, John Kale, i tok taim ol i bin laik stopim dispela mas bilong ol sumatin, sampela narapela pipel long taun i bin joinim na stat long sutim ol polis wantaim ol ston na ol hap hap diwai.

PPC Kale i bin tok tu olsem ol displea sumatin i no bin kisim tok orait long holim dispela mas.

Tasol niusmeri Mis Mission husat i bin lukim dispela trabel i tok em i bin lukim pas bilong ol sumatin em ol i bin givim i go long polis.

PNG bai wokabaut long sapatim Wes Papua

OL sapota bilong Wes Papua long sampela senta long PNG bai wokabaut long soim sapat bilong ol long ol Wes Papua.

Fred Mambrasar, lida bilong Free Wes Papua kempen long PNG i tok dispela Walk for Freedom Mas bai kamap tu long Maun Hagen long Westen Hailans Provins, Madang Provins na long Popondeta long Oro Provins.

Em i tok as tingting bilong dispea wokabaut em bilong soim ol Pasifik Ailan lida olsem wari bilong ol long humen rait aninit long Indonesia i stap yet na ol i laikim sapat i kam long rijon long luksave long dispela wari bilong ol.

PNG gavman plen long daunim 2015 baset

Stanley Nondol i raitim

KANTRI i no gat inap mani na PNG gavman i gat plen nau long kamap wantaim rot long daunim 2015 baset long dispela taim we prais bilong oil i go daun na kantri i no mekim inap mani long yusim long mani plen bilong 2015.

Minista bilong Treseri, Patrick Pruaitch i tok, gavman i no gat mani we em bin plen long yusim long ol wok developmen long 2015 baset.

Mista Pruaitch i tok gavman bai daunim baset o rot we em i yusim mani long dinau bilong kantri i no ken go antap moa.

O'Neill gavman long las yia Novemba i tokaut long K16.2 bilien baset bilong 2015. Na dinau bilong kantri nau i sanap long K19 bilien.

Gavman i lukluk long kisim bikpela winmani long PNG LNG projek long yusim long ol developmen long 2015 mani plen. Tasol prais bilong

oil long wol maket i pundaun na kantri i no mekim inap mani long sapatim baset.

Ol saveman long Institut bilong Nesenel Afeas (INA), Nesenel Risets Institut na tu Oposisen i singaut long O'Neill gavman long kwik taim kamap wantaim saplimenteri baset long daunim hevi bilong no gat mani na ol dinau bilong gavman.

Mista Pruaitch i tok gavman bai katim daun ol baset bilong 2015 long dinau bilong kantri i no ken go antap moa na long lukim ikonimi bilong kantri gro long ol yia i kam.

Mista Pruaitch i tok Intanesenel Moniteri Fan (IMF) i kam long kantri long toktok wantaim gavman long Ogas 9 i go long 21 na em i tokim gavman long katim daun baset na i no ken yusim planti mani long 2015 na 2016. IMF i tok oil na mineral sekta na arapela sekta olsem agrikalsa i no gro na nidim polisi.

IMF i tok prais bilong ol ko-

moditi long wol maket i pundaun na OK Tedi maining i pas bihainim wara i sot bai lukim winmani bilong kantri bai pundaun na gavman bai no inap kamap wantaim balens baset long 2016 na 2017. Winmani kantri i mekim bai no inap wantaim plen bilong yusim mani.

Mista Pruaitch i tok gavman bai katim K1.3 bilien long 2015 baset na Tresari i lukluk long daunim dinau baset long ol yia i kam.

Em i tok gavman nau i lukluk long wokim K2.5 bilien long Soveren Bon.

Mista Pruaitch i tok gavman i plen long kamap wantaim rot long katim baset, daunim dinau, apim reveniu, na mekim PNG kamap gutpela ples bilong ol investa long bihain taim.

Em i tok nau em i taim bilong kontrolim rot gavman i save yusim mani bikos kantri i no gat dispela mani we gavman i plenim long yusim long 2015.

Tok pait kamap long takis-GST

Stanley Nondol i raitim

TOK PAIT i kamap long ol wok bilong Takis Riviu Komiti (TRC) we Siaman Nagora Bogan i tokaut olsem takis bilong ol kaikai na sevis bai go antap long 15 pesen na gavman i daunim kopret takis bilong ol bikpela kampani.

Praim Minista Peter O'Neill long dispela wik i tok i no gat nupela takis na ol pipel i no ken pret olsem takis bilong guds na sevis o GST i go antap

Mista O'Neill i tok gavman i no apim takis yet na i tok ol pipel i no ken pret long ol toktok olsem takis bai go antap. Em i tok gavman bai no inap mekim ol liklik manmeri kisim taim na i gat rot long kantri i ken mekim inap mani long sapatim baset.

Praim Minista O'Neill i mekim dispela tok bihain long Siaman bilong TRC i kamap wantaim rekomende-

sen bihain long wok riviu bilong ol long takis sistem long kantri olsem GST bai go antap long 15 pesen, nau stap long 10 pesen na takis bilong ol bikpela kampani bai kam daun.

Planti komplek i kamap long sosel midia na long nius long las wik na dispela wik olsem go antap bilong GST long 15 pesen bai givim hat taim long ol pipel long baim ol samting long pe o mani bilong ol na bai mekim moa hat long ol sevim mani.

Gavana bilong Oro Garry Juffa i tok planti ol timba kampani na ol arapela kampani i na baim takis long bikpela milien kina long planti yia na tu gavman i rausim takis long planti bilong ol ausait kampani na ol i sevim bikpela milien kina.

Mista Juffa i tok gavman i mas kamap wantaim rot bilong kisim ol takis long ol kampani olsem ol bikpela

timba kampani wok long abrusim lo na i no baim takis long bikpela lain na i no ken apim takis bilong ol liklik pipel long givim hat taim long laip bilong ol.

Long wankain taim oposisen lida Don Polye i singaut long IRC long lukluk gen long ol rekomendesen na wok painim bilong ol long no ken apim GST. Em i tok planti milien pipel long kantri em ol liklik pipel olsem grasrut we i no gat gutpela wok mani na ol bai kisim taim.

Mista Polye i tok oposisen i no gat inap namba tasol ol bai traim long stopim taim gavman i tebolim ripot bilong TRC long palamen long Okotoba 2015.

Mista Polye i tok gavman i mas lukluk long helpim ol pipel long sevim mani na wanpela bilong dispela rot em long daunim inkam takis long ol i ken gat inap mani long poket.

Nambawan supa givim toktok bilong seavings long ol memba long Hagen

BIKPELA Supaenuesen Fan long kantri, Nambawan Supa Limited (NSL) i go stret long ol pipel na givim toktok bilong sevim mani na ol sevis bilong supafan long helpim ol memba i kisim ol infomesen na gutpela sevis bilong Supa Fan.

Sif Eksekutyutiv Opisa (CEO) bilong NSL Garry Tunstall na Siaman Anthony Smare long las wik i go long Mt Hagen na givim ol toktok bilong sevim man na ol wok na sevis NSL i mekim long helpim ol memba insait long kantri.

Ol 70 memba bilong NSL long Westen Hailans na Jiwaka provins i makim ol skul, distrik, provinsal edministresen, helt senta, polis CIS Papiindo Treding na PNG Pawa

na harim toktok bilong CEO Tunstall na Siaman Smare long Hailenda hotel.

Mista Smare i tokim ol memba olsem ol pipel bilong PNG i mas givim mani long bihain taim. Em i tok sevim mani i mas kamap kalsa bilong ol pipel. Na i tokim ol long ol wok bilong NSL long mun Janueri i kam long Jun 2015.

Mista Smare i tok NSL i mekim 3.5 pesen profit long hap yia bilong 2015 long taim we kantri i bungim hevi bilong ikonimi we lukim prais bilong oil, na ol arapela komoditi i pundaun long wol maket.

Mista Tunstall i tokim ol memba long ol sevis NSL i mekim insait long 2-pela yia long stretim ol sevis long

mekim isi long ol memba long ol i ken kisim.

Mista Tunstall i toktok long volanteri kontribusen, we ol i ken kisim pinis mani nsait long 24 aua, ol sevis bilong NSL long teks mesej long mobail fon na long intanet.

Em i tok ol memba i ken sekim stetmen bilong ol stat long 2014 long intanet. Em i tok NSL bai lonsim smatfon aplikesen long dispela mun.

Mista Tunstall i tok NSL i apgredim ol rijonal senta long givim wol klas sevis long ol memba. Ol senta NSL i apgredim em; Lae, Mosbi, na Goroka. Em i tok NSL bai apgredim Hagen na Kokopo rijonal senta klostu taim long ol memba i ken kisim gutpela sevis.



CEO bilong Nambawan supa, Garry Tunstall na Siaman Anthony Smare i givim toktok long ol memba long Mt Hagen.



The new Fokker 70 jet service. Faster, higher, smoother.....

Call Toll Free on 180 3444 or contact your nearest Air Niugini Travel Centre or Travel Agent to learn more about our F70 jet service.



Ol piksa stori bilong ol refuji o ol asailam sika hevi long Yurop

LAIK GO LONG HUNGARY:



NAU Yurop i bungim asailam sikas kraissi o hevi olsem ol dispela yumi ken lukim hia long ol poto.
Ol ripot bilong Intanesenel Ogenaisesen bilong Maigresen i tok Yurop nau i wok long bungim bikipela hevi moa bihain long hevi

long Wol Woa 2, long ol asailam sika husat i ronawe lusim ol asples bilong ol bikos long hevi na pait na ol i painim seif hap long stap long en long narapela kantri.
Long dispela yia, moa long 350,000 asailam sika i kamap pinis long ol kantri long Yurop.

BAI MI MEKIM WANEM NAU?



Mi wokabout longpela rot pinis na mi no nap givap nau.
Ahmad Orabi, i gat 25 kris-mas i wanpela asailam sika bilong Syria i tok taim em i go insait long banis long go long kantri Macedonia.
Vais Sansela Sigmar Gabriel i tok long lusim na pasim ol open boda bai kisim Yurop i go bek gen long histori bilong em.

Ol Poto: ABC Courtesy of Reuters

BUDAPEST TREN STESEN:



Ol maigren o asailam sika long Budapest tren stesen.

KELETI RELWE STESEN LONG BUDAPEST:



Ol asailam sika i stap nau long Keleti Relwe stesen long Budapest, neibai kantri bilong Hungary we planti asailam sika i makim long go long en.

EU PROTOKOL:



Ol polis bilong Hungary bai bihainim ol protocol o lo bilong Yuropien Yunien (EU) long makim ol EU memba kantri, mausman bilong gavman bilong Hungary,

Zoltan Kovacs, i tok.
Poto i soim ol polis i putim was na banis long Budapest tren stesen.

HELPM SYRIA:



Wanpela asailam sika i holim bena wantaim helpim sain long ol Syria refuji.
Vais Sansela bilong Gemeni, Angela Merkel i tok i moa beta long tilim ol refuji i ronawe long

won a ol i laik kilim ol tu long ol wan wan kantri long Yurop, skelim long strong bilong mani bilong wan wan kantri, produktiviti na sais bilong kantri.

MRDC sapotim Kundu Festival

Stanley Nondol i raitim

MINEREL Risos Developmen Kampani (MRDC) i gat bikipela luksave long ol kalsa bilong ol papgraun bilong risos provins bilong Sauten Hailens na i sapotim ol long promotim na banisim ol kalsa long ol lain tumbuna bihain.

Long dispela wik MRDC i givim K50, 000 i go long namba 5 Kutubu Kundu na Digaso Festival we bai kamap long Daka Kalsarel Senta long Kutubu, Sauten Hailens long Septemba 25 na 26..

Total mani MRDC i sapotim dispela festival wantaim em K150, 000 nau stat long yia 2011. Olgeta yia em i save givim K50, 000 inap nau em i kisim dispela kain mak bilong mani.

Menesing Dairekta bilong MRDC, Augustine Mano i tok ol papagraun i save sanap long graun bilong ol long sapotim olgeta laip bi-

long ol na famili bilong ol na MRDC em i kampani i menesim mani na intres bilong i sapotim ol long lukautim kalsa na risos bilong ol, long taim em i givim K50, 000 i go long ol memba bilong fesitvel komiti.

Mista Mano i tok MRDC i amamas long sapotim dispela festival long ol papagraun i ken promotim kalsa na tumbuna pasin na tu ol i ken lukautim gut bus, graun na ol envairomen long provins i gat bikipela risos long sapotim kantri.

Bikipela toktok bilong Kutubu Kundu na Digaso festival em; Lukautim gut Pasin Tumbuna na Lukautim Envairomen.

Deputi siamen bilong Festival Komiti Andrew Igmabo i singaut long olgeta komyuniti long Kutubu na Sauten Hailens long strongim kalsa na lukautim envairomen.

Kutubu Kundu na Digaso festival i gat nem long kalenda bilong kantri na

bikipela bung i save kamap wan wan yia bihain long em i stat long 2011 na i lukluk long strongim ikoturism, inkam jeneresen long lokol level na long tokim ol yangpela lain long lukautim envairomen na holim pasin kalsa na pasin tumbuna long no ken i dai.

Kutubu rijon long Sauten Hailens Provins em i gat bikipela risos bilong kantri na i save memim bikipela winmani i go insait long baset bilong gavman. Kutubu i gat Kutubu oil fil na PNG LNG projek.

Wankain taim Exxon Mobil PNG o bikipela sponsa bilong Kutubu Kundu Festival i givim K29,000 long fesitvel komiti long stretim ol wok samting bilong festival

Menesing Dairekta bilong Exxon Mobil Larry Andrew i tok kampani i gat bikipela wok long helpim ol papagraun long strongim na lukautim kalsa na envairomen.

CIC i no gat bod na kopi prodaksen i pundaun yet

KOPI industri Koporesen i no gat bod long pait hat long stretim ol hevi bilong kopi insait long kantri, maski planti singaut i kam long ol pipel, gavman i no makim bod yet.

Rurel industri i tok Kopi industri i mas kisim luksave na gro wankain olsem ol arapela industri na i gat nid long ristraksa i mas kamap na singaut long gavman i mas kwiktaitim putim CIC bod long wok bilong akuntabiliti na givim daireksen long skruim wok bilong CIC.

Sif Eksektiv Opisa bilong Rurel Industri Kaunsil, Graham AINU i tok kopi industri em bikipela na bilong olgeta pipel long kantri na i no bilong ol liklik lain long opis long lukluk daun na i no mekim inap wok long menesim industri.

Mista Ainui i tok prodaksen bilong kopi na eksport i pundaun na wok i mas kamap olsem makim bod na sapotim fama long apim prodaksen bikos namba bilong eksport na prodaksen i pundaun long las 5-pela yia.

Long wankain taim ol fama, liklik kopi blok holda, eksporta na ol arapela husat i kamap long

Kopi Forum long Goroklas wik i tok CIC na Nesenel Gavman i no menesim kopi sekta gut na lukim prodaksen i bagarap na ol fama i kisim taim.

Ol i tok CIC i no menesim industri gut na i go mekim wok bilong Laipstok Developmen olsem lukautim ol hanibi. Ol i tok dispela em wok bilong DAL na CIC i mas go bek long wok bilong em long menesim Kopi.

Moa long en ol fama na ol plantesin holda na ol eksporta i wari long graun bilong planim nupela kopi diwai i sot na i tok CIC i mas wok hat long go long ol ples i gat graun long wokim ekstensen sevis long ol fama i mas planim nupela kopi diwai.

Hailens Famas na Setla Asosisen preseiden, Wilson Thompson i tok Nesenel Gavman i laikim kantri bai salim 6 milien kopi bek long wol maket long yia 2030 na 2 milien bek long 2020 tasol i luk olsem dispela bai no inap kamap.

Em i tok yumi kamap namel long 2030 na yumi i no kam klostu yet long bungim mak gavman i laikim.

Mista Thompson i tok ol wankain hevi tu i bungim ol arapela egrikalsa krop na laipstok na Dipatmen bilong Praim Minista na Dipatmen bilong Nesenel Plening i mas kamapim rivi long visen 2030, PNG Stratejik Developmen Program 2030 na Midium Tem Developmen Strateji 2017.

Mista Thompson i tok rot we egrikalsa sekta i ran nau em stap long mak nogut na namba bilong eksport i wok long pundaun na kantri bai no inap long bugnim ol mak bilong eksport we gavman i makim long ol plen bilong en.

Hailens Famas Asosisen i gat bikipela wari long ol bilong kaikai egrikalsa prodak i pundaun bikipela tru na laikim gavman long lukim ol dispela hevi na kamap wantaim rot na sapot long helpim ol fama na kantri long stretim ol hevi.

Hailesn Famas na Setlas i holim bikipela PNG Kopi Forum long las wik long Goroka na ol planti lain i autim wari olsem kopi industri i pundaun na sapos nogat sapos bai lukim industri i dai.



Darekta bilong Petroleum Risos Kutubu (PRK) John Yawari, Menesing Darekta MRDC na ol ples lain long Kutubu i soim K50,000 sek mani MRDC givim long Festival komiti.

PNG Ports Corporation Limited (PNGPCL) i sapotim Pasifik Tuna Forum wantaim K5,000 we Nesenel Fiseris Atoriti (NFA) i go pas long en.

Pasifik Tuna Forum bai kamap long Septemba 22-23 long Fiji.

Gavman bilong Papua Niugini – Nesenel Fiseris Atoriti na gavman bilong Fiji wantaim Fiji Ministri bilong Fiseris bai bung na holim dispela forum wantaim.

Dispela bung long Fiji em bai lukluk long wok bilong menesmen bilong fiseris insait long Pasifik rijon, intanesenel treid na lukluk long strongim na skruim wok na maket bilong Tuna bisnis insait long Pasifik rijon.

PNGPCL Ekting Jenerel Menesa bilong Bisnis Developmen, Guma Wau Jnr i tok PNGPCL i mekim planti wok pinis long ol maritim provins long kantri na i amamas long wok bung wantaim NFA long sapotim dispela forum long Fiji long dispela yia na long ol yia i kam.

Mista Wau i givim K5,000 sek mani i go long NFA na i tok, wok bung em bikipela samting we yumi i ken mekim liklik wok tasol em bai karim kaikai long planti pipel i ken kisim sevis.

Em i tok aninit long visen 2015, kampani i gat sosel responsibiliti long sapotim forum long Fiji na i kampani wantaim wokman i amamas

long patna wantaim NFA long TUNA bisnis na tu long ol arapela bisnis long strongim na groim ikonomi bilong PNG.

Developmen Kodineta bilong NFA, Bolton Yowok i tok tenkyu long PNGPCL long sapotim NFA long Tuna forum na i tok moa olsem wok bung i mas kamap namel long ol patna insait long kantri long gutpela bilong kantri na pipel.

Em i tok NFA i wokim bris na i lukluk long wok moa klostu wantaim PNGPCL long ol yia i kam.

Rijonal Tuna industri na treid konpresns bai lukim ol pipel i ken toktok long ol wok bilong ol long Tuna bisnis na

PNG Ports sapotim Pasifik Tuna Forum



ol rot we ol bai helpim ol yet long bisnis.

Dispela bung bai lukim moa long 200 pipel long praiwet na pablik sekta bai kamap long Fiji insait long rijon na tu long wol.

PNGPCL Ekting Jenerel Menesa –Bisnis Developmen, Guma Wau Jnr (namba tu long lephan givim sek i go long NFA Industri Developmen Kodineta, Stephen Sallun, Tupela wanwok tu i stap lukluk long dispela taim.

Aplikesen bilong Dairek Eid Program gren i op nau

AUSTRALIA Dairek Eid Program bilong helpim ol Papua Niugini lain hust i laik mekim senis long laip bilong ol em i op nau long aplai long ol gren mani.

Stat long 1 Septemba, 2015 i go inap long 31 Oktoba 2015 ol lain husat i laikim aplai long dispela program bilong kisim helpim stret long Australia gavman, i ken go long dispela adres long internet na kisim fom; www.png.high-commission.gov.au/pmsb/cooperation.html na ol i ken salim email i go long Port-Moresby.dap@dfat.gov.au.

“Dairek Eid Program i save strongim ol liklik komyuniti developmen na humeniterian projek bilong ol Papua Niugini stret,”

Ekting Hai Komisina bilong Australia long PNG, Mis, Bronte Moules, i tok.

“Mipela i laik helpim ol projek we i save helpim ol meri na ol pipel husat i gat sampela bagarap long bodi bilong ol na tu long ol yangpela lain long kisim moa wok long wok bilong ikononik na sosel laip long PNG,” Mis Moules i tok.

Ol ogenaiesen na komyuniti grup husat i save wok long ol developmen na humeniterian wok na i no bilong kamapim propit i ken aplai long ol dispela gren mani. Planti bilong ol dispela gren i projek em i stap aninit long mak bilong K50,000, tasol ol bikpela projek inap kisim mani long mak bilong K120,000 (o AUD\$60,000). Planti ap-

likesen bai kam olsem na sampela bai i no inap kisim mani sampela taim.

Husat lain i laik aplai em ol i mas ritim gut ol gaidlain long lukim sapos ol i stap long mak bilong aplai long dispela gren.

Ol dispela gaidlain na aplikesen fom i stap long dispela adres we ol i ken kisim long internet; <http://png.high-commission.gov.au/pmsb/cooperation.html>.

Bihain long ol i pinisim ol i ken salim i go stret long,

Dairek Eid Program Kodineta long email adres:

Port-oresby.dap@dfat.gov.au o salim pas i go long: Australian High Commission, Locked Mail Bag 129, Godwit Road, Waigani NCD.



Australia Bisinis Volantia, Sue McCuaigi lainim ol lain bilong Nusalik, Nu Ailan Provins, long wokim ol bilas long ol sel bilong nambis. Em i wanpela hap bilong Dairek Eid Program bilong dispela yia we i kamap pinis.

Fainensel Literesi strongim ol meri



BSP Kundiawa Fainensel Literesi trening tim i lainim pinis 84 meri bilong ples Bamne insait long bus namel long Jiwaka na Chimbu Provins long we bilong lukautim mani wantaim BSP Fainensel Literesi program.

BSP Kundiawa tim i bin singautim ol meri long statim program bihain long ol i harim planti gutpela wok BSP Benk i wok long mekim long ol narapela hap bilong provins.

BSP Fainensel Literesi Trena, Jackie Bal na tim bilong em i taitim bun long go insait long bus antap long maunten inap ol i kamap

long ples we ol meri stap na ol i mekim gutpela trening wantaim ol.

“Komyuniti i amamas long lainim ol pasin bilong lukautim gut mani bilong ol, na ol i askim planti kwesten na ol i tokaut tu olsem ol i no bin kisim dispela kain save bipo, tasol nau ol i save na ol bai yusim long lukautim gut ol liklik mani bilong ol,” Mis Bal i tok.

Meri go pas long Gawai Wimen’s Enteprais, Paula Toman i amamas long kisim trening bikos em na ol lain mama grup i kisim planti gutpela save.

“Mipela ol lain husat i stap

long trening i amams tru bikos em i tokim mipela long planti nupela samting, em i givim save long mipela na tu i kirapim tingting bilong mipela. Mipela i gat sans long askim wanem samting mipela i no kliia long en long ol sevis we benk i save givim,” Misis Toman i tok.

“I no gat man i bin toksave long mipela long ol sevis bilong benk olsem, sevim mani, basetim mani na ol benking sevis. Nau mipela i save na mipela i ken yusim long hel pim mipela long lukautim ol liklik mani bilong mipela,” em i tok.

Ol meri sindaun long taim bilong trening.

Lumbi Kaunsil Wot DSIP ripot

WANPELA lokol komyuniti i givim bek ripot bilong ol mani we ol i bin kisim long mekim wok bilong Helt na Edukesen sekta insait long wanpela bikpela selebresen long las wik.

Ol pipel bilong Imbongu Distrik i soim bikpela laik long lukim ol gavman sevis olsem na ol i givim bek Ripot bilong K200,000 Distrik Sapot Impruvmen Program Fan ol wantaim selebresen.

Insait stori bilong ripot bilong K200,000 i soim ol i bin kirapim tupela haus kapa klasrum we wan wan i kisim K50,000 na Et Pos wantaim wanpela haus bilong Komyuniti Helt Wokman.

Lumbi Kaunsil Wot insait long Imbongu Ilektolet i stap olsem 15 kilomita longwe long Mendi Taun, na narapela 4-pela kilomita moa long ran long kar long hap kona bilong Hailans Haiwe long Mendi.

Em i namba wan taim bilong komyuniti long givim olgeta ripot bilong K200,000 bilong Helt na Edukesen fan we gavman i givim long Imbongu Distrik Sapot Impruvmen Program Fan long 2014.

Long Pape Pramereri Skul, ol i kirapim wanpela haus kapa klasrum long wanpela K50,000 na narapela long Lumbi skul wantaim narapela K50,000 we bai givim gutpela ples bilong lainim skul. Ol sumatin bilong tupela skul bai i go long Yebi Hai Skul we i kisim mani kam long Minista bilong Wok na Implementesen na

Memba bilong Imbongu, Francis Awesa.

Yebi Hai Skul i save kisim gutpela mak long skul olgeta yia inap long 5-pela yia na taim ol i bin kirapim. Em i save kamap namba wan long provins na tupela bilong ol gret 10 sumatin bilong em i bin kamap namba wan long Matematik na namba 2 long Saiens insait long Kantri long yia i go pinis.

Ol komyuniti i bin redim ol tumbuna sing sing, ol skul sumatin tu i singim Nesenel Entem na wanpela kwaia i kamap. Komyuniti i givim wanpela ripot tu bilong K100,000 we ol i bin yusim long senisim olpela haus kunai Et Pos wantaim nupela long haus kapa.

Dispela projek i lukim ol bikpela sevis bilong gavman olsem helt ken a edukesen long go long moa long 2,000 pipel bilong Lumbi, Tuta, Pape, Pororo, na ol ples i stap klostu long Kagua-Erave Ilektolet.

Minista bilong Wok na Implementesen i bin opim tupela klasrum na ol pipel i amamas wantaim long dispela. Mista Awesa i bin tok kliia long ol pipel long wanem as na em i no mekim ol wok bilong em long ilektolet inap long 5-pela mun bikos long wanpela lidasip kot. Em i tok em i gutpela long em i go insait long dispela long ol i stretim gutpela nem bilong em we i bin bagarap wantaim sampela tok bilong wok i no kamap gut.

Em i tok kliia olsem distrik bilong ol i no

gat ol samting bilong graun olsem Oil na Ges olsem na em i putim moa mani i go long Edukesen long strongim save bilong ol man na meri long ilektolet na provins bilong em. Em i tokaut olsem em i makim pinis wanpela K50,000 long wan, wan bilong ol 28 skul insait long ilektolet bilong em long kamapim gut ol infrastraksa bilong ol.

Em i tokim ol skul bot long ol i mas lukautim gut ol samting bilong skul. Em i lukim olsem ol sampela skul olsem Pundia Limbiale skul i wokim sampela

klasrum na ol haus tisa wantaim dispela mani tasol. Em i tok em i stap long han bilong ol pipel long sekim ol wan, wan skul bilong ol long painim aut long dispela mani bilong ol.

Provinsal Edministreta bilong Sauten Hailans, Joe Kaiyo, Helt Edvaisa, Michael Mombu, Distrik Edukesen Edvaisa, Mark Tupia, Fes Seketeri Philip Moya, Distrik Edministreta, Allan Kaiabe na ol pablik sevan i bin stap long dispela opening seremoni wantaim ol pipel bilong Lowa Menda.



Ol sumatin long Tutam Pramereri skul i redi long opim nupela klasrum.



Ramu NiCo kamapim gutpela NMERC long Madang



2015 NMERC tim poto fran long DWU SVD auditorium

PLANTI ol lain i kam long ovasis olsem ol spona na tu ol arapela lain i kam long ol arapela maining kampani i tok amamas long Ramu NiCo Menesmen (MCC) long kamapim gutpela Nesenel Imejensi Rispons Salens (NMERC).

Ramu NiCo long dispela yia 2015 i go pas long redim ol program bilong namba 5 NMERC long Madang na i yusim ol eria long PNG Maritaim Koles na Divine Word University (DWU) long kamapim imejensi rispons salens.

Insait long dispela salens o kompetisen ol imejensi rispons tim (ERT) bilong ol bikpela maining projek long kantri i bin go bung ns resis long helpim long sait long stopim paia, resis long yusim rot long helpim man bungim hevi, wok abrusim ol marasin i gat posin na tu helpim planti lain bungim biru.

Menesing Dairekta bilong Mineral Risoses Atoriti, Philip Samar i tok bikpela amamas i go long Ramu NiCo (MCC) long redim gut stret na lukautim program bilong NMERC.

Mista Samar i tok olsem dispela tupela de kompetisen i bin gutpela tru na em i amamas long lukim ol tim i resis.

"Mi laik tok tenkyu long ol ogenaisa na kampani i lukautim salens long dispela yia em Ramu NiCo," Mista Samar i tok.

"Yupela i mekim gut stret salens long dispela yia," em i tok.

Long taim bilong givim ol awot i go long ol tim long kompetisen we i bin kamap long Madang Risot Hotel, Gavana bilong Madang, Jim Kas na Memba bilong Usinobundi tu i bin stap long lukim.

Ol tims husat i bin kamap long salens long dispela yia em Newcrest Lihir wantaim tupela tim, wanpela blong man na arapela em blong ol meri, Ramu NiCo wantaim tupela tim, Hidden Veli, Barriek Porgera, Oil Search na Simberi Gold.

Sif Inspekta bilong Mains, Mohan Singh i tok planti samting long sait long sistem na rot long lukautim sait long sefti i senis insait long 5-pela

yia. Long nau yet i gat ol istem na procedure i stap.

Tasol, Mista Singh i tok wanpela bikpela samting we em i laik lukim i senis em long sait long lidasip insait long maining indastri long go pas long ronim kain bikpela salens olsem NMERC.

Em i mekim dispela toktok tu bihain long tim bilong Oil Search Limited (OSL) i kamap namba wan wina long dispela 2015 NMERC.

Ol arapela tim tu i bin kisim ol medal olsem ol i stap insait long dispela resis.

Mista Singh i tok em i amamas long lukim ol gutpela fasiliti o samting long wokim ol salens o kompetisen long Madang we i stap long PNG Maritaim Koles na DWU.

Mista Singh i askim ol maining kampani long PNG long mekim yus long ol dispela moden fasiliti bilong PNG Maritaim Koles long wokim ol trening bilong ol.

"PNG Maritaim Koles i ol naispela fasiliti we nogat planti lain i yusim, olsem na mi askim maining indastri lain long mekim yus long ol dispela fasiliti," Mista Singh i tok.



Lihir tim 2 meri wokim endurens kompetisen



Malti kesualti



Rop reskiu salens



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College



An initiative of:
National Apex Mining Safety Council



Under the auspices of:
Mineral Resources Authority

Hodkinson bai no inap pilai

HAPBEK bilong Canterbury Bulldogs, Trent Hodkinson, bai no inap long pilai moa long Nesanel Ragbi Futbal (NRL) bikos em i bin kisim bikipela bagarap long sait bilong em.

Tariq Sims husat i bek roa bilong Newcastle Knights i bin bamim Hodkinson taim Tim Lafai i bin putim wanpela trai long 25 minit we Bulldogs i win 20-18 long las wik Sarere nait.

Namba 7 bilong Nu Saut Wels i tokaut olsem, "Ol dokta i bin sekim Hodkinson long

Sande moning na risal i soim olsem em i bin kisim bikipela bagarap we wanpela bun i bin lus long sait bilong em na em bai go long operesen."

Oi Bulldogs i stap namba 6 long lata, tasol huka bilong ol, Michael Lichaa, i bin kisim bikipela bagarap long lek na em bai stap wanpela yia long lek bilong em bai orait.

Oi tim husat i stap long top-8 bai bungim planti bagarap taim ol bai salens strong long kisim taitel bilong resis.

Roosters i stap namba

wan long lata, tasol prop bilong ol, Jared Waerea-Hargreaves, na Hapbek, Mitchell Pearce, i no pilai moa bikos ol i bin kisim bagarap.

Brisbane i stap namba 2 long lata, tasol em i lusim representativ frant roa bilong em, Josh McGuire.

North Queensland husat i stap namba 3 bai mekim ran bilong em we Michael Morgan na James Tamou bai no inap stap wantaim.

South Sydney i stap namba 7 long lata, bai banisim ol

top tim long kisim premiasip long tupela moa pilai i stap, i bin lusim Kapten bilong ol, Greg Inglis, husat i kisim bikipela bagarap long skru.

Long wankain taim, Skipa bilong ol, John Sutton, i bin kisim bagarap long lek bilong em bai joinim Inglis. Na lo bilong NRL i bin rausim huka bilong ol, Issac Luke, long em i bin givim wanpela strongpela solda sas.



Oi Poto na stori: ABC

Farah i soim kala bilong em taim Tigers i daunim Warriors

ROBBIE Farah i bin soim tru kala bilong em taim Wests Tigers i bin daunim Warriors 50-16 long Campbelltown pilai graun.

Farrah i gat kontrak i stap yet, tasol em i bin tokaut pinis olsem em bai lusim Tigers long neks pilai resis

na nau Farrah i bin pilai strong long kisim Tigers i kam antap long lata.

Mak long 6,711 pipel i bin lukim pilai i stap na singaut long Robbie na i tok, "Robbie, Robbie," bikos long stail pilai bilong em we em i bin putim tri-pela trai long Sande na ol

lain i soim amamas bilong ol.

"Taim mi putim ol trai, mi harim olsem singaut bilong ol lain i go antap moa na kolim "Robbie" i mekim na aiwara bilong mi bin pundaun isi isi," Farah li tok.

Fara i tok, "Mi bai no gat wanpela hevi long wok wantaim kosa bilong ol Tigers, Jason Taylor, long neks yia taim em bai stret wari bilong mi long sait bilong pei."

"Robbie wantaim mi bin wok bung insait long wanpela wik long kamap wantaim dispela kain risal," Taylor i tok.

Warriors i bin lus 7-pela taim na pulbek bilong ol, Sam Tomkins, i kam out long pilai graun long namba 2 hap bikos em i bin kisim bagarap long skru bilong em.

Storms i stap namba 5 long lata

MELBOURNE Storms i bin lus taim ol i pilai wantaim ol Newcastle Knights long las wik, tasol nau ol i stap namba 5 ples long lata taim ol i bin daunim ol North Queensland Cowboys 14-6 long AAMI Pak pilai graun.

Storms i no pilim orait taim ol i bin bagarapim pilai bilong ol egensim Knights long wankain pilai graun long Mande nait, tasol ol i amamas gen olsem ol bai go insait long top-4 resis taim ol i bin daunim ol Cowboys.

Melbourne i stap namba 5 ples taim Cowboys i stap yet long namba 3 ples long lata.

Oi Cowboys i bin stap pas long taim ol i stat pilai, tasol Storms i strong tru long daunim ol Cowboys bikos ol i bin krugutim asples bilong ol.

Pulbek bilong Melbourne, Cameron Munster, i strongim



banis bilong Storms tumas na Cowboys i bin painim taim tru long putim trai.

Oi Storms i win na pusim ol Rabbitohs, husat i bin stap namba 4 ples, i go bek long

namba 7 ples, taim ol Rabbitohs i lus long raun namba 25 we Brisbane i win 47-12.

Nau Rabbitohs bai banisim premiasip resis wantaim ol tim husat i stap pas.

Williams i stat long painim Slam

SERENA Williams i stat long painim Grand Slam isi isi taim Vitalia Diatchenko i laik stop pilai long US Open.

Bihain long ol i opim pilai bilong ol, Williams i go long namel bilong pilai graun we olgeta pipel bilong Nu Yok i lukluk stap wantaim bikipela singaut bikos em i putim gol long 7-pela pilai.

Oi sempion husat i putim 6-pela gol i go aut long Ashe pilai graun bihain long 30 minit long kisim moa biknem na em i gat 6 moa win long joinim ol wina bilong Grand Slam olsem Maureen Connolly, Margaret Court na Steffi Graf.

Williams i win wantaim 32 poin we Diatchenko bilong Russia i lus wantaim 5 poin.

Long namba 7 minit, 21-taim Grand Slam Singles sempion i daunim pilaia husat i gat taitel long US Open, na em i birua pilaia bilong Williams husat i stap long namba 86 ples.

Williams i bin apim nem bilong olgeta manmeri long Nu Yok taim em i bin kisim namba wan taitel long 1999 US Open we em i liklik meri long dispela taim.

"Mi gat bikipela sapot na strong long mi bin setim sampela mak pinis we mi bai kisim moa strong long dispela resis na mi bai win," Williams i tok.

"Nau mi stap long asples, mi pilim orait na mi redi pinis olsem mi bin mekim long 1999."

Em i daunim Diatchenko long namba wan pilai na i daunim Dutch Kwalifaia, Kiki Bertens, long namba tu raun.

"Mi bai lukim olsem i nogat wanpela samting we mi bai lusim, sapos mi stap isi, makim ol poin na stap amamas long hia," Williams i tok.

Hayne i joinim NFL

BIPO pilaia bilong Parramatta Eels, Jarryd Hayne, i bin tokaut long 10-pela mun i go pinis olsem em i lusim Parramatta na NRL long pilai long NFL.

Long wankain taim long ABC Grensten, 55.9 pesen bilong ol pipel i stap insait i no ting olsem em bai mekim gut, tasol Hayne i sainim \$US100, 000 kontrak pinis wantaim San Francisco 49ers long dispela yia.

Sans bilong em long pilai long NFL em i sot yet taim ol i lukluk long sait bilong pilai long Australian, tasol em i bin pilai tupela prisisen pinis aninit long Niners.

Em i namba wan pilaia husat i bin pilai long Stet ov Oriijin na em i yusim olgeta kala bilong em na i no gat wanpela stop i kam namel long ran bilong em insait long tupela tupela prisisen pilai.



Manus em sempion bilong NGI

MANUS soka tim bilong ol man na meri i kama sempion bilong Besta Kap long Niugini Ailan taim ol i winim tupela tim bilong ol Nu Ailan.

Manus na Nu Ailan tasol i bin stap long dispela resis bilong Besta Kap we ol bin holim long Lombrum Nevel Bes long Manus Ailan.

Ol tim long Rabaul, Kokopo, Wes Nu Briten na Bogenvil i no stap long dispela resis na dispela i mekim ol lain husat i go pas long dispela tonomen i no amamas.

Niu Ailan i salim 6-pela tim bilong ol go long dispela resis, 3-pela bilong ol man na 3-pela bilong ol meri na dispela i mekim tonomen i kamap gut na strong stret.

Manus kamap wina bilong ol man taim ol winim Nu Ailan na pilai bilong ol meri i lukim tu Manus tu i winim dispela taitol.

Digicel Play i kisim NRL Raits

Esther Bralyn Wani i raitim

DIGICEL Play i kisim rait bilong soim Nesenel Ragbi Lig (NRL) long Papua Niugini. Dispela bai givim ol rait bilong NRL Primiasip Lig, Stet ov Orijin Siris, AI-Stars Mets, ANZAC Tes na Anda-20 resis long nau inap pinis bilong 2017.

Digicel Play bai stat long soim ol NRL mets ol i makim long nupela TVWAN Ragbi sanel. Ol bai opim long dispela wiken, TV WAN Ragbi sanel bai stat na givim ol pipel bai lukim i amamas wantaim dispela brodkas bilong Cowboys i pilai egensim Titans.

Sif Eksekutiv Opisa (CEO) bilong Digicel Play, Ralph Siebenaler i tok, "Mipela i serim laik bilong ol PNG long ragbi lig na i amamas stret long kisim rait bilong soim NRL. Bai mipela i orait long karim aut gutpela NRL long ol kastoma bilong mipela long PNG."

"Dispela Sarere i gat planti eksen long wiken bilong ol pipel husat i save laikim ragbi. De bai stat wantaim Digicel Kap fainel na bihainim bai go het wantaim opening bilong TVWAN Ragbi sanel," Mista Siebenaler i tok.

Digicel Play bai soim stat bilong Cowboys egensim Titan gem long hap 7 long nait long nupela TVWAN Ragbi sanel. Gem bai fri long olgeta kastoma husat i gat Digicel Play boks.

Nesenel Konfederesen Sempionsip i stat pinis

PAPUA Niugini Ragbi Futbal Lig (PNGRFL) i statim pinis 2015 Nesenel Konfederesen Sempionsip long Tunde long Lae, Morobe Provins.

Ol 4-pela jon olsem Sauten, Hailans, Niugini Ailans na Noten konfederet i bin makim ol pilaia bilong ol pinis long pilai long sempionsip resis.

Olgeta tim i go pinis long kapital bilong Morobe long Tunde. Dispela em i wanpela bikpela samting long sait bilong PNGRFL program i kamap long Lae Ragbi Lig pilai graun.

Skulbois Anda 16 sempionsip i stat pilai long Tunde tai mol i opim gem na Anda 18 sempionsip resis i bin stat long Trinde (asde).

Sempionsip resis bilong ol meri bai stat pilai nau (Fonde) na long Fraide ol senia man sempionsip resis bai pilai na pasim pilai bilong ol.

Olgeta divisen ba pilai long wanpela de resis na ol bai tokaut long ol wina aninit long amas win ol bai winim

long tripela pilai long wanpela de. Dispela rot bilong painimaut ol wina i gat as tingting olsem i no gat wanpela fainal bai kamap.

Long Senia Man divisen, ol nesenel selekta bai lukluk gut long pilai bilong ol pilaia na ol bai makim ol namba wan pilaia na selektim ol long ol bai pilai long Praitim Minista 13 pilai bai kamap namel long PNG na Australia.

Na tu long Praitim Minista 13, ol bai selektim sampela moa pilaia long Septemba 26, aninit long Digicel Kap resis we ol bai pilai gren fainal long Sarere, Septemba 5.

Long Anda 16 skulbois, ol bai selektim sampela pilaia tu aninit long Nesenel Konfederesen Sempionsip resis, long Septemba 27 we ol bai pilai egensim Nu Saut Wels.

Siaman bilong PNGRFL, Sandis Tsaka, i tok, "4-pela de resis long Lae bai redim gutpela rot bilong ol nesenel se-

BSP i stretim Hohola Basketbal kot

HOHOLA basketball pilai graun long Nesenel Kapital Distrik (NCD) i kamap nupela gen bihain long Nesenel Plening na Kopret stretejik bisnis yunit (SBU) bilong Benk Saut Pasifik (BSP) i stretim.

Bung em i liklik, tasol Presiden bilong Basketbal Federesen PNG, Nick Daroa, Dairekta bilong PNG Man Basketbal Lig, Lawrence Lahari, BSP Menesmen na ol basketbal grup i stap wantaim.

Ol wokman bilong BSP i yusim wiken bilong ol insait long 6-pela mun long kama-pim dispela projek.

Ol wokman i bin klinim olgeta hap bilong kot na bihain ol i rausim ol olpela bens na putim nupela bens. Na ol i stretim ol bruk banis insait long pilai eria.

Ol BSP wokman tu i stap insait long taim bilong putim ol nupela bod hup na pentim ol ploa bilong kot na ol bens.

Ol i bin putim ol bikpela lait arere long kot long ol i ken pilai long ol nait tu.

Presiden bilong Basketbal Federesen PNG, Nick Daroa, i amamas long BSP long em i gat tingting na i bin mekim basketball kot i kamap nupela gen.

Daroa i tok dispela em i stat bilong ol nupela samting bai kamap long NCD.

"Bikepla tenkyu i go long BSP long mekim Hohola Basketbal pilai graun i kamap nupela gen wantaim ol nupela bod, ring na bens," Daroa i tok.

"Insait long planti yia, dispela basketball kot i stap naturing na makim maus bilong ol Basketbal komyuniti insait long Pot Mosbi, mi tok tenkyu tru long BSP."

Em i bin tok moa olsem, "Ol PMBL na Pot Mosbi woman Basketbal Lig i bin yusim dispela kot na PMBL i

bin yusim long ranim ol junia divisen."

Grup Koporet Jenerel Menesa bilong BSP, Peter Beswick, i tok, "Long makim maus bilong BSP, mi ken tok olsem BSP i amamas long kamap famili bilong dispela komyuniti."

"Dispela kot bai stap bilong ol yangpela pilaia i ken pilai na kamap namba wan pilaia long bihain taim olsem ol narapela i bin go pinis," Beswick i tok.

"Mi laikim ol pilaia na ol narapela lain husat bai yusim dispela kot i ken yusim gut."



Presiden bilong Basketbal Federesen PNG, Nick Daroa i sekan wantaim BSP Grup Kopresen Jenerel Menesa, Peter Beswick, i makim olsem BSP i givim projek i go long Basketbal Federesen PNG. Ol wok manmeri bilong BSP tu i stap wantaim long taim bilong givim dispela projek.



GREN FAINAL TAIM: Dispela tupela tim bai bung long 2015 Digicel Kap Fainal bai kamap long dispela Sarere long Sir John Guise Stadium. Long poto, pilaia bilong Rabaul Gurias i laik traime abrusim pilaia bilong Simbu Lions long pilai bilong ol long Kokopo long raun tu bilong Digicel Kap. Tupela tim bai traime strong bilong ol long winim Digicel Kap na pilai wantaim top tim bilong Fiji long dispela mun. *Poto Nicky Bernard.*

Hunters i wet long semi fainal

PAPUA Niugini SP Hunters i wet long semi fainal bilong Intra Supa Kap resis bihain ol i bin daunim ol Burleigh Bears 44-24 long las wik Sande long Sir John Guise pilai graun long Pot Mosbi.

Hunters bai pilai semi-fainal wantaim maina premia taim, Townsville Blackhawks, long Sepetemba 12. Blackhawks i bin daunim ol Redcliff Dolphins 44-22 long Jack Manski pilai graun long las wiken.

Hunters i bin daunim ol Bears wantaim 20 poin we ol i putim 4-pela trai long namba wan hap na 4-pela trai gen long namba tu hap bilong pilai.

Ol 4-pela pilaia husat i bin kisim ol skoa long namba wan hap em Esau Sione, Kapten Israel Eliab, Stargroth Amean na Adex wera.

Amean na Eliab i bin putim namba tu trai bilong tupela long namba tu hap bilong pilai na Noel Zemming na Tompson Tete i bin putim wan trai long namba tu hap.

Ol Hunters i bin skruim skoa bilong ol i go antap long 44 long pinis bilong pilai taim ol Bears i bin bihainim ol i kam antap wantaim 24 poin.

"Hunters bai sten bai long pilaim gren fainal sapos em i winim semi-fainal, tasol em i

gat namba tu sans i stap yet long pilai long elaminesen-fainal sapos em i no win long semi-fainal," kosa bilong Hunters, Michael Marum, i tok.

Em i tok moa olsem, "I no gat wanpela senis i bin kamap namel long ol boi bilong mi bikos ol i bin pait strong long kisim wankain skoa 28-28 wantaim ol Mackay Cutters long asples bilong ol long Mackay, tasol

mipela i stretim sampela liklik asua long winim ol Bears."

Hunters i gat sans yet long winim maina Premiasip, tasol Marum i tok ol i no wari tumas long kisim maina Premiasip bikos bikpela samting em ol i stap yet long fainal.

"Trening bilong Hunters i bin kamap gut long las wik na ol boi i bin amamas tu long las pilai bilong ol long Mosbi we ol i bin win," Maru i tok.



Wanpela pilaia bilong ol Hunters i bin makim wanpela trai na ran strong long Kalabon pilai graun long Kokopo, asples bilong ol Hunters.



TRAI TAIM: Noel Zeming bilong PNG SP Hunters redi long putim wanpela trai long pilai bilong ol wantaim Bears long las wiken long Pot Mosbi. Poto Nicky Bernard.

Lions bai go long gren fainal bihain long 20 yia

OL TNA Lions long Simbu provins bai go long gren fainal bilong Digicel Kap bihain long 20 krismas.

Dispela amamas 19-12 win bilong ol Lions egensim ol maina premia, Lae Snax Tigers, long las wiken long Dickson Oval ol pilai graun i soim olsem dispela kap bai go long kapital bilong Simbu, Kundiawa, long Mande long wik i kam.

Driman bilong Francis Ona Gerard Philip i karim kaikai

taim em i bin tingting olsem ol lokel i ken kamap namba wan pilaia na putim dispela kap long rurel eria.

Namba wan taim we Simbu tim i bin go long gren fainal em long 1996 long Lae aninit long Simbu Warriors.

Tasol, Warriors i bin lus long gren fainal na amamas bilong ol i bin go daun long pilai gen long ol narapela sisen bikos ol manmeri i bin kirapim pait.

Ol i bin rausim Warriors

klap long 10-pela yia na ol i bin tokim ol long raitim pas gen long larim ol i pilai.

Simbu lig i wanbel na taim 10-pela yia i go pinis, ol i statim gen bisinis bilong pila.

Ol i bin baim prais bilong pilai bihain long 3-pela yia aninit long TNA bena bilong ol.

Philip na ol yangpela bilong em long ol maunten ples Simbu bai kirapim pait wantaim ol mangi long Rabaul long Sarere long Sir John Guise pilai graun.

Pukpuks i bin redi gut long kisim ol Hunters

OL PNG Pukpuk i redi pinis long wik i go pinis yet olsem ol bai winim ol Solomon Ailan Hunters long las raun pilai bilong 2015 Osenia Ragbi Kap i bin kamap long las wik Sande.

Kosa bilong Pukpuk, Sydney Wesley, i bin tok, "Tim bilong mi bin redi pinis long daunim ol Hunters na winim Tropi."

"Dispela pilai i bin strong tru tasol ol Solomon Ailan i bin painim taim tru long winim," Wesley i tok.

"Mi bin tokim ol pilaia bilong mi olsem mipela bai winim

dispela pilai, tasol wok bilong mipela i no pinis yet na yu-pela i mas pilai long gem plen bilong yumu."

Pulbek bilong ol Pukpuk, Jonah Kautu, i sik na i no bin pilai, tasol winga bilong ol, Wesley Vali, i bin orait long bagarap em i bin kisim long namba wan pilai na kisim ples bilong Kautu.

"Ol Solomon Ailan i bin apim nem bilong wanpela bikpela fowed pek bilong ol na i bin kisim strong long em long winim fainal, tasol tim

bilong em i bin lukluk gut tru long dispela," Wesley i tok.

Ol i gat bikpela pek long fowed, tasol mipela i bin ban- isim ol gut tru long Sir Hubert Murray pilai graun long Konedobu, Pot Mosbi we skoa i bin sanap olsem 58-19.

Pukpuk i bin stap long namba wan ples na Tahiti i stap namba tu taim ol i bin winim ol American Samoa 20-9.

American Samoa i bin stap namba 3 na Solomon Ailan i bin pasim rot wantaim namba 4 ples.

POMCA i laik painim ol namba wan pilaia

POT Mosbi Kriket Asosiesen (POMCA) long Intanesenel Trening Institut long Pot Mosbi (ITI) bai kamapim kriket pilai long painim ol namba wan kriket pilaia long Papua Niugini.

Ol i rejistaim 24 tim pinis long ol bai pilai long dispela yia long 6-pela hap bilong pilai insait long Pot Mosbi na Sentrel Provinces.

Ol tim i bin mekim 4-pela

pul we tupela top tu tim kwalifaia bai go long fainal.

Presiden bilong, POMCA, Dean Ani, i tok, "T20 Big Bash i bungim olgeta tim long Sentrel Provinces na Pot Mosbi i mekim dispela resis i strong tumas."

"Dispela em i wanpela namba wan tingting we POMCA i bin kamapim long painimaut moa namba wan kriket pilaia na ol opisal long

ol Sentral tim husat bai pilai," Ani i tok.

Em i tok tenkyu long sponso bilong ol, ITI, Kriket PNG na Badili Hardware long givim bikpela sapot long mekim dispela pilai i kamap.

"Mipela i gat plen long kamapim T20 Big Bash olsem wanpela yia iven na fainal bilong dipela yia pilai bai kamap long Septemba 12 na 13," Ani i tok.

Lions i win long resis



Pilaia bilong birua tim bilong Lae Snax Tigers i bin mekim wanpela strongpela takol long Tigers pilaia i soim olsem ol Tigers i sot win long resis bilong ol long Digicel Kap.

TNA SIMBU Lions i bin win long Papua Niugini Digicel Kap Ragbi futbol resis.

Pilai i bin kamap namel long TNA Lions long Simbu na Lae Snax Tigers we Lions i bin pait strong na daunim ol Tigers 19-12 long las wik Sande bikos ol i bin pilai long asples bilong ol Lions long Dickson pilai graun long Kundiawa.

Dispela em i namba wan taim we Simbu bai go insait long gren-fainal bilong Digicel Kap premia resis i bin kamap insait long kantri.

Dispela yia i makim namba 4 resis bilong ol Lions we kosa, Hans Kaybing, i winim pait bilong em long go insait

long gren-fainal.

Lions bai pilai wantaim ol Agmark Rabaul Gurias long Is Nu Britan, husat i save go long ol fainal long planti taim we pilai bai kamap long Pot Mosbi long dispela wik Sarere.

Ol Tigers i bin pret liklik long ol sapota bilong birua tim bikos sapot bilong ol i strong tumas we ol i bin stap long mak bilong kamapim birua pasin sapos ol Tigers i win.

Long malolo taim bilong namba wan hap, skoa i bin sanap 6-6 na ol Tigers i kompelen long ol bai no inap long pilai long namba tu hap, tasol ol gem kodineta i tok long givim win nating long ol Lions sapos ol Tigers i no

kisim pilai graun kwiktaitim.

Ol i bin toktok insait long 50 minit na bihain ol i stat pilai we Tigers i prèt pinis long winim dispela pilai.

Lions i bin kisim moa strong wantaim ol sapota na daunim ol Tigers we nau ol redi long go long gren-fainal.

Maus man bilong TNA Lions, Gerard Philip, i tok, "I no gat wanpela birua pasin i bin kamap we olgeta manmeri i bin stap isi na pilai i pinis."

Ol pilaia yet i bin painimaut wanpela asua insait long pilai graun na laik pait, taso ol i wanbel na pilai gen we Lions i bin putim tupela trai wantaim wanpela fil-gol long namba tu hap na i winim ol boi Morobe



SPES WE? Hap bek bilong Burleigh Bears i lukluk long spes long traime abrusim banis bilong Hunters.



TRAIM BANIS: Kepten bilong Hunter, Israel Eliab, i traime banis bilong ol Bears. Israel i putim tupela traime long kisim tim bilong em i go antap long semi final long narapela wiken antap.



TOP WINGA: Gordon em i wanpela top winga bilong Bears na Titans long NRL. Em kam wantaim tim bilong em, Bears, long Kwinslen Kap taim ol pilai wantaim Hunters.

HUNTERS STRONGIM BANIS: Banis bilong Hunters i no strong tumas long namba wan hap, tasol long namba tu hap ol i strongim banis bilong ol gut tru olsem ol dispela tripela.



RONAWE: Thompson Teteh i ronwei long banis bilong Bears long skorim traime aninit long pos. Hunters i winim Bears 44-24.

Ol poto: Nicky Bernard



HOLIM MI: Pilaia bilong Yunivesiti Tigers i ronawe long pilaia bilong Gerehu Maggies long AFL pilai bilong ol long wiken long Mosbi.




Travel to Losuia

Come Experience a Unique Culture!



Linking our Country  **LinkPNG**

Reservations - Toll Free: 1805465 Email: sales.linkpng@airniugini.com.pg Find us on Facebook: www.facebook.com/linkpng



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by




RD Tuna Canners Ltd.

Moa mit na
oil insait



TUNA IN OIL



Kwinslen Kap redi long fainal

LAS wiken pilai bilong Intra Supa Kap i makim las raun bilong dispela yia pilai resis na ol i bin painim pinis tuol tim bai pilai long eliminesen fainal .

Oi Townsville Blackhawks i strongim premiasip bilong dispela sisen taim ol i bin daunim ol Redcliffe Dolphins 46-22 na i stap namba wan long lata.

Blackhawks na Hunters i lus long tripela pilai tasol long dispela sisen.

Ipswich Jets i kisim namba tri ples taim em i bin daunim Sunshine Coast Falcons.

Wynnum Manly Seagulls i bin daunim Eastes Tigers 17-10 na

i pusim ol i go long namba 5 ples na Seagulls i stap long namba 4 ples long lata long go long eliminesen fainal.

Northern Pride i stap long namba 6 ples long lata taim em i bin daunim Central Capras 46-18 long las wiken.

Blackhawks na Hunters bai malolo long dispela wiken bikos tupelo i go pas long lata.

Dispela wiken pilai bai makim namba wan raun bilong eliminesen fainal na Jets bai pilai wantaim ol Pride long asples bilong ol Jets na Seagulls bai pilai wantaim Tigers. Oi lusa bilong dispela wiken pilai bai go aut long

dispela sisen.

Namba tu raun bilong eliminesen fainal bai kamap long wik i kam, na wina bilong Jets Vs Pride bai pilai egensim wina bilong Seagulls Vs Tigers.

Long wankain taim, Hunters bai pilai wantaim ol Blackhawks na Wina bai sten-bai long gren fainel bai kamap long Sande, Septemba 27, long Suncorp Stadium long Brisben, Australia.

Long raun namba 3 bilong eliminesen fainal, wina bilong gem namba 4 bai pilai wantaim lusa bilong Blackhawks Vs Hunters na long raun namba 4, ol bai pila gren fainal.

Kepten bilong SP Hunters, Israel Eliab, i lukluk long pasim bal long wan pilaia long gem bilong ol wantaim Burleigh Bears long wiken. Eliab em wanpela long ol top poin skoara long Kwinslen Kap resis.
Poto Nicky Bernard

Strongpela Marasin Bilong Kus

Gutpela Prais!

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

